

HEBREUX, KAPU YA SAMBANU ³



Mbote, bankundi. Ya kele bweso na kuvwanda awa. Ya ke lomba kieleka kubaka luzingu ya kieleka mpe—mpe samu na kulungisa nkotolo ya nene yayi na pasteur ya beto, mutindu yina ve? Na yawu beto ke pesa nkembo na Mfumu samu na bangolo ya Yandi ya nene ya kubeluka ya nzutu mpe mawa ya Yandi yina Yandi me pesa na beto bamvula nyonso me luta.

Ntangu yayi mu ke na mwa bansangu ya kupesa. Ya ntete, beto, Mpangi Wood mpe Mpangi Roberson, mpe beto zola kutonda beno nyonso na kusambilaka samu na beto, samu na nzyetolo ya mbote. Beto vwandaka me kuzwa ntangu ya mbote; beto kwendaka kaka bilumbu yiya mpe na ndambu, mu banza, mpe me vutuka dyaka mbote. Mfumu me sakumuna beto.

⁵⁰⁶ Ntangu yayi, beto ke zabisa ti balukutakanu ya yandi, ya Mpangi Graham Snelling, ke na kulandilaka, kuna na nsuka ya Avenue Brigham, na . . . na mbanza awa. Mpe na nkokila ya Kilumbu ya tatu yina ke na kwiza . . . Mu zola kukwenda mbasi, na manima ya bisambu ya lufwa ya muntu mosi yina mu ke zabisa na mwa ntangu fyoti. Beto ke zabisa beno na nkokila ya Kilumbu ya tatu. Beto zola kukwenda na kimvuka, beto nyonso, samu na kwenda tala Mpangi Graham ntete yandi kanga balukutakanu ya yandi kuna. Mpe beto ke meka na kuzwa dibuundu nyonso kintwadi, kana beto lenda, mpe kukwenda mutindu kimvuka mosi samu na kukutana, na kuvwanda na Mpangi Graham na mosi ya balukutakanu ya yandi.

⁵⁰⁷ Mpe, ntangu yayi, na manima ya midi yayi na—na yinzo ya bamvumbi na Charlestown, ya kele na Mama Colvin, yina vwanda kwizaka na dibuundu awa bamvula mingi me luta, makumi sambwadi na yiya ya bamvula, yina me bika luzingu yayi mazono samu na kwenda vwanda na Mfumu Yesu. Mpe Tata Révérend McKinney, ke longa na mafwa ya yandi na Kilumbu ya ntete, yandi vwandaka, na ntangu ya ntama, pasteur ya dibuundu ya ba-Méthodiste na—na Port Fulton bamvula mingi, yandi vwandaka nkundi ya ntima ya bawu. Mpe mu ke sadisa yandi, na Kilumbu ya ntete, na, mu banza ya kele na ngunga mosi na ndambu na manima ya midi, na—na chapelle na Charlestown, na Indiana. Mpe beno nyonso bankundi ya dibuta Colvin bawu ke zola, mu zaba, bawu ke zola mingi ntangu yayi kaka mwa lusiamusu to . . . mwa kupesana mbote. Samu ti beto nyonso zaba yinki ya kele, beto bayina me lutaka kuna, na biwanda, beto mosi, mpe beto zaba yinki ya zola kutuba na kuzimbisa mpangi. Mpe na yawu beto . . . Yandi kele ya kulala na—na chapelle ntangu yayi, na Charlestown, na Indiana. Kana beno kwenda kuna na manima ya midi yayi, mbote, ya ke yangidika dibuta ya Colvin, mu ke kwikila. Mingi ya bawu dyaka ke kwizaka awa

na tabernacle. Mu me kwelisaka, me zikaka, me botikaka, na kutala, dibuta ya bawu, nyonso. Mpe na yawu Tata Grayson, yina vwanda vwandaka finangani ya beto kaka awa, yandi kele mfumu ya yinzo ya bamvumbi kuna.

⁵⁰⁸ Mpe kuna yayi, na nkokila yayi, kana Mfumu zola, kisika beto ke suka na suka yayi, beto ke meka na kulandila na nkokila yayi, na kati ya kulongoka ya nene yayi yina beto ke na kulongokaka na ntangu yayi. Mpe kuna mu banza ti yina vwandaka bansangu, landila mutindu—mutindu mu—mu me zabila. Mpe na nkokila ya Kilumbu ya tatu yayi yina ke na kwiza, beto ke zabisa nkokila yina ti beto ke kwenda na Mpangi Graham.

⁵⁰⁹ Mpe beto ke tuba nkwizulu ya mbote na banzenza nyonso yina kele na kati-kati ya beto. Mpe beto kele na kyese na kuzwa beno awa na suka yayi, mpe beto ke sambila ti Nzambi na bunene, ya kulutula, kusakumuna beno bubu yayi na kuvukana yayi.

⁵¹⁰ Mpangi Cox vwanda me tuba kaka na munu ti système ya sonorisation vwanda tambula mbote mingi ve ntangu yayi. Ya lenda vwanda, mu banza samu na ntangu, ya kele na madidi mingi na ba-baffle kuna. Mpe ya kele mbote mingi ve, na kubanda, na yawu yina lenda vwanda dyambu.

⁵¹¹ Na yina mu ke mona mpangi ya kento ya kuvwanda awa yina mu zaba, Mpangi ya kento Arganbright, mu . . . Yayi kele mbote ve mpe—mpe mutindu ya mbote ve, na kulomba yayi, kasi nge me kuzwa bansangu ya Mpangi Arganbright katuka yandi kele kuna? Mu zola mingi kuwa yandi na ntangu ya kulunga. Yandi kele na Suisse mpe na Allemagne, na balukutakanu kuna na Mpangi Tommy Hicks mpe Paul Cain. Kana nge kuwa, Mpangi ya kento Ruth, na nswalu zabisa munu, na nswalu nyonso nge lenda.

⁵¹² Ntangu yayi, na mwa tabernacle yayi beto kele ve na bamambeke, kasi beto ke kuzwaka kubundana. Beto kele na ata crédo ve kasi Klisto, ata musikulu ve kasi zola, ata buku ve kasi Biblia. Ya kele Buku kaka yina beto zaba, mpe kima kaka ti beto zaba, mutindu beto me kuzwa. Mutindu Menga ya Yesu Klisto ke sukulaka beto na masumu nyonso, beto ke kuzwaka kubundana mosi na yankaka, na muntu nyonso.

⁵¹³ Mu vwanda tala, na suka yayi, samu na ndambu ya beno bantu yina vwandaka me kuwa mpangi ya bakala kusambila. Yina vwandaka muntu ya Katolika, na yawu, to muntu ya Katolika ya ntama. Mpe beto kele na mitindu nyonso ya bantu yina ke kwizaka awa. Mu vwanda me kuzwa bweso, mwa ntangu fyoti me luta, na kusimba diboko ya mpangi mosi ya bakala Mennonite yina kele ya kuvwanda awa. Mpe kana ba vwanda ba-Mennonite, ba-Méthodiste, ba-Baptiste, mpe bantu ya Katolika, to nyonso yina ya lenda vwanda, beno bika bawu kukwiza. Mpe

beto ke bundanaka kintwadi na nziunga ya masakumunu ya Ndinga ya Nzambi. Ya kele ya kuvwanda awa ba-Témoin ya Jéhovah mpe mitindu na mitindu ya bantu, na yawu, ya ba-dénomination ya mutindu na mutindu.

⁵¹⁴ Mu vwandaka zola (mbote, mu zola dyaka) Wesete. Mu zola bampunda mpe bitwisi. Mu kulaka kaka na ferme, mpe mu—mu zola yawu. Mpe beto vwanda vukisaka baniama, mpe mu vwanda kwendaka na bawu. Mpe beto vwandaka na lupangu ya baniama. Mu zaba ve kana beno bantu ya Esete zaba yinki kele lupangu ya baniama, to ve. Ya kele ntangu beno ke tula bitwisi na kati ya mfinda, bawu kele na lupangu samu na kukanga bawu na kukwenda kisika yankaka, mutindu bawu ke bokilaka, kuvutuka na ba-ferme. Bawu ke kudya matiti, kisika bawu ke bumbaka matiti samu na kisifu. Mpe kuna na zulu ya mongo, bawu kele mpe na mapangu ya baniama, kisika bawu ke kabisaka bitwisi mingi ya bakento mpe ya babakala, mpe nyonso yina. Ba ke bokilaka yawu lupangu ya baniama. Kasi lupangu ya mfunu ya baniama ya kele yina kisika mfumu ya kutala ke telama ntangu bitwisi ke na kulutaka.

⁵¹⁵ Mpe ntangu yayi mu me vwandaka kuna, bilumbu mingi, na selle ya munu, mpe mpe kumona bawu na yina kitwisi ke luta. Ya vwandaka na mitindu nyonso ya bidimbu na kukota kuna. Ya vwandaka na bayankaka nkumbu “Diamond.” Mpe bayankaka ya bawu vwandaka “Bar X.” Mpe bayankaka . . . Baya beto vwandaka “Tripod,” kima mutindu Bendele Ya ba-Éclairer. Muntu yankaka, na yisi ya yawu, ya vwandaka “Turkey Track,” na zulu ya mpunda. Mpe ba vwandaka na mitindu nyonso ya bidimbu, samu—samu na kuzaba baniama ya bawu ntangu bawu ke nata bawu na ngaanda.

⁵¹⁶ Ntangu yayi, mfumu ya kutala vwanda tala mingi ve na wapi kidimbu vwandaka na bawu, kasi awa kele yina, mfumu ya kutala vwanda tala mingi mbote na kidimbu na dikutu ya bawu. Nyonso yina vwandaka kota kuna, ata wapi mutindu ya kidimbu ya vwandaka, ya zolaka vwanda Hereford ya dikanda ya menga mosi. Ya zolaka kota kuna ve kana ti ya vwandaka Hereford. Ba zolaka sonika baniama to ya zolaka luta ve.

⁵¹⁷ Mu banza, na kilumbu yina ntangu Mfumu ke kwiza, Yandi ke tala ve na wapi kidimbu yina kele na beto, kasi kana beto nyonso kele Baklisto yina me butuka mbala ya zole. Ya kele kieleka. Yina kele dikanda ya Klisto. Kizama ya Menga ke lakisa beto, beto nyonso kele Miklisto. Mpe kana beto ke vwanda mutindu yina *kuna*, beto lenda mutindu mosi kuvwanda mutindu yina awa. Beno banza mutindu yina ve? Ya kele samu na yina, beto ke zolaka mingi kubundana na mutindu nyonso ya mabuundu.

⁵¹⁸ Awa beto ke na kulongokaka na Buku ya kusakumuka ya Hébreux. Mpangi mosi ya bakala me sepela mingi na yawu tii

yandi me baka babande mpe yandi ke na kusalaka buku ya kutanga na zulu ya yayi.

⁵¹⁹ Ntangu yayi beto ke na kwiza, ntama mingi ve, na kapu ya 11. Beto banza kulutisa kisifu nyonso na zulu ya yawu, na kapu ya 11. Samu na mosi na mosi ya bantu yango, beto zola kuvutuka na Buku mpe kuvukisa Masonuku ya muvimba kintwadi. Mu zolaka sala yawu. Mu ke salaka na ndambu, na bayankaka ya yayi, ya bakapu yayi ya ntama, samu na kuzwa Buku nyonso ya kuvukisa kintwadi. Samu ti, beno me mona, Masonuku fwana monisa Masonuku.

⁵²⁰ Na yawu, kana ya kele na luswaswanu mosi, ti muntu ke banza ti Masonuku ke swaswakana mosi na yankaka, yina kele foti. Ya kele na ata Masonuku yina ke swaswakana na Masonuku. Luswaswanu kele kisika yina mu banza Yawu ke swasikisa mutindu ya beto ya kutala Yawu, kasi Yawu ke swaswakana na Yawu mosi ve. Mu kele na kati ya ministère, ya me kuma makumi zole na sambanu ya bamvula ntangu yayi, mpe munu ata mbala mosi ve, na ntangu mosi, me talaka kima mosi na kati ya Biblia yina ke swaswakana na kima yankaka yina me sonamaka na kati ya Biblia. Mpe mu—mu zaba kaka ti ya kele kuna ve.

⁵²¹ Mpe bubu yayi beto ke na kulongoka mosi ya bakapu ya kulutisa kusakumuna ya Hébreux, kapu ya 7. Mpe kana ya kele na muntu yina kele ve na Biblia, yina ke zola kulanda beto na bakutanga, beto ke sepela na kunatina beno Biblia kana beno telemisa kaka diboko ya beno. Mu ke lomba mosi ya bakuluntu, muntu mosi, yina ke kwiza awa mpe ke kuzwa ndambu. Bantu me telemisa maboko ya bawu na manima kuna. Mpe matondo na nge, mpangi ya bakala. Mpe kana beno zola Biblia, beno telemisa kaka diboko ya beno, mpe bawu ke natina beno yawu.

⁵²² Ntangu yayi, mutindu kaka ti dibuundu lendaka tungama, mutindu kaka ti muntu lendaka kuzwa Lukwikilu, ya kele ve na dénomination ya yandi, ve na kuvukana ya yandi. Kasi Lukwikilu ya yandi kupema ve na zulu ya théologie ya mwa mabanza ya muntu, samu ti ya kele, ya kulutisa to ndambu, me katuka na muntu. Kasi mutindu kaka Lukwikilu lendaka kuzwa kisika ya yawu mosi ya kupema, ya kele na zulu ya Ndinga ya Nzambi yina ke ninganaka ve mpe yina ke sobaka ve. “Lukwikilu ke kwizaka na nzila ya kuwa, kuwa Ndinga.” Ya kele mutindu ya ke salaka. Mpe—mpe ntangu Lukwikilu me wakana mpe me ndimama, ya me bongwa kukondwa nsuka. Kima mosi dyaka ve lenda ningisa yawu, ata yina ke kwiza to ke kwenda. Kima ve lenda sobisa Lukwikilu yina. Beno banza na yawu. Beno kele ya kukangama, mpe beno ke soba ata dyaka ve, samu na ntangu mpe Seko. Beno kele ya kukanga samu na kukondwa nsuka, “Samu ti Nzambi, na nzila ya munkayulu mosi, me kumisa ya kulunga samu na kukondwa nsuka bayina kele ya kusantisama, to ya kubokila.”

523 Mpe Lukwikilu kele na kisika mosi ya nene na kati ya Muklisto, na luzingu ya mukwikidi, ti yandi lenda baka kutelama ya yandi na lweka ya ndyamu ya poto-poto to na zulu ya sanduku ya mvumbi, kisika bébé ya ntalu to ya ntima me luta luzingu yayi na mazulu. Mpe na kutala ya ngolo ya meso ya ngononi, lenda tala na Yandi yina tubaka, “Mu kele Mvumbukulu mpe Luzingu.” Mpe bawu ke zimbana bima yina lutaka. Bawu ke na kukima mbangu na mantwala ya musendo yina ya lubokilu na mazulu.

524 Mu ke sepela mingi ti Nzambi me kubika mutindu, mpe me sala yawu dikabu ya mpamba samu na beto nyonso. Ya kele yina mabuundu fwana vwanda. *Mabuundu* zola ve kutuba ba-dénomination to ba-organisation; ya zola kutuba, “Bankonga ya bantu, ya mikwikidi, bayina ke vukanaka kintwadi na yisi ya kubundana ya Ndinga.”

525 Mpe na malongi ya ngitukulu yayi awa ya Santu Paul, na balufulu, na bakapu ya ntama, yandi na mutindu ya pwelele vwanda tubila na bunene ya Bunzambi ya Mfumu Yesu mpe Nani Yandi vwandaka. Klisto vwandaka Nzambi, samu na kusala ti bantu lenda kuwa Yandi mpe kusimba Yandi, mpe—mpe kubundana na Yandi. Klisto, Mfumu Yesu, vwandaka nzutu yina Nzambi zingaka na kati, “Nzambi kumaka nzutu mpe zingaka na kati-kati ya beto.” Ya Ntete ya Timothée 3:16, “Kukondwa kutula ntembe mansweki ya kinzambi kele nene, samu ti Nzambi kumonisamaka na nzutu.”

526 Jéhovah ya nene kulumukaka mpe kumaka yina ba lendaka simba, na kuzingaka na kati ya nzutu ya Mwana ya Yandi Mosi, na kutubaka mpe kuvutulaka yinza na ngwisani na Yandi mosi. Nzambi vwandaka kima ve. . . Klisto vwandaka ata kima ya fyoti ti Nzambi, mpe—mpe Nzambi vwandaka ata kima ya fyoti ti Klisto. Bawu zole kintwadi salaka Kinzambi na nzutu, ya kusala mwa yisi mingi kulutula Bawanzio, samu ti Yandi tala mpasi. Bawanzio lenda tala mpasi ve. Yesu vwandaka Tabernacle yina Nzambi zingaka na kati.

527 Biblia ke tuba, na kapu ya 7 ya Actes ya Bantumwa, ti, “Batabernacle, mpe minka- . . . munkayulu mpe minkayulu ya kuyoka Nge zola ve, kasi nzutu Nge me kubika samu na Munu. Kasi ya Zulu Mingi ke zingaka ve na batabernacle yina bantu me sala, kasi nzutu Nge me kubika Munu,” ti na kati ya tabernacle yina to na kuzingaka na kati samu na kubundana na muntu.

528 Kana Nzambi pesa muswa, na yina beto ke manisa na kapu yayi awa, to kumanisa na Buku yayi, beto ke zola kuvutuka mpe kubaka Buku ya Ruth mpe kulakisa na kati kuna ti mutindu Nzambi kumaka mpangi ya beto, samu na kuvutula na ngwisani bayina zimbanaka na Yandi mosi na kubundanaka mpe na kukumaka mosi ya beto. Mukudi fwana vwanda mpangi, mpe mutindu kaka ti Nzambi zolaka kuma mpangi ya beto, ya kele na

kukumaka mosi ya beto. Na yawu, Yandi zolaka kuma ve Wanzio mpe kuvwanda mpangi ya muntu.

529 Mazono na nkokila na yina mu vwanda zonzila na mwana ya bakala yina ntima kele ya kulwala, mpangi ya munu, yina mama me kufwa kaka ntama ve, yandi tubaka, “Oh Mpangi Bill, mu banza ti yandi me kuma Wanzio na nkokila yayi.”

530 Mu tubaka, “Ve, Earl. Yandi ke vwanda ata mbala mosi ve Wanzio. Yandi kele kento, na nkokila yayi, mutindu kaka Nzambi salaka yandi, mpe ke vwanda ntangu nyonso, ata mbala mosi ve Wanzio.” Nzambi salaka Bawanzio. Yandi salaka ata mbala mosi ve bantu kukuma Bawanzio. Yandi salaka Bawanzio *mpe* bantu. Na yawu bantu ke vwanda ata mbala mosi ve Bawanzio, mpe Bawanzio ke vwanda ata mbala mosi ve bantu. Nzambi salaka bawu ya kuswaswana.

531 Na yawu, mpe na Klisto na kukumaka nzutu samu na kuvulusa muntu na lweka yankaka yina ya nene kisika yandi kubwaka, mpe kukondwa kufwa yina yandi zimbisaka samu na disumu, Nzambi kulumukaka mpe bakaka nzutu ya mutindu ya muntu, mpe kumaka mpangi ya beto, ti Yandi lenda nata masumu ya beto mpe lufwa ya beto.

532 Mpe na mosi ya bifwanukusu beto vwanda pesa, na baleso ya ntete; kaka samu na mwa dibanza samu na bayina me kwiza ya malu-malu samu na kubakula. Nzambi, na nzila ya Yandi na Calvaire, na yina ntunga ya lufwa vwandaka na Yandi, mpe vwandaka sala makelele pene-pene ya Yandi, mpe na nsuka ya tsokotaka Yandi tii Yandi kufwaka. Yandi kufwaka tii ntangu mwini mangaka na kupesa nsemo. Yandi kufwaka tii ngonda mpe bambwetete zolaka ve kupesa nsemo ya bawu.

533 Samu ti, wapi mutindu Yandi zolaka sala yawu, samu na kukanga ntunga ya lufwa! Kana Yandi zolaka vwanda muntu yina ke kufwaka ve, kana Yandi zolaka vwanda na Théophanie, to vwandaka na kimpeve, lufwa kele na ata lutwadusu na yawu ve. Yandi zolaka kuma nzutu, samu ti Yandi zolaka baka ntunga ya lufwa. Kasi ntangu nyosi to kitutu yina ke tsokotaka, mbala mosi yandi me tsokota na kati, yandi ke tsokota dyaka ata mbala mosi ve. Yandi ke bika ntunga ya yandi na kati ya nzutu. Mpe ya kele yina Klisto ku- . . . to Nzambi kumaka. Klisto zingaka na nzutu, samu ti Yandi zolaka kanga na kati ya nzutu ya Yandi Mosi ntunga ya lufwa. Mpe na yina lufwa basikaka na Yandi na kulunsi, ya bikaka ntunga ya yawu, ya lenda dyaka ve kutsokota mukwikidi. Ya lenda sala makelele, ya lenda sala makelele mpe boma, kasi ya lenda ve kutsokota. Ya kele ata na ntunga ve.

534 Santu ya nene Paul, na nzila ya yandi na lufwa, bokaka mpe tubaka, “O lufwa, wapi kisika kele ntunga ya nge? Mpe ndyamu, wapi kisika kele kununga ya nge? Kasi matondo na Nzambi Yandi yina me sala me pesa beto kununga na nzila ya Mfumu

ya beto Yesu Klisto, samu ti nyonso zole lufwa mpe ndyamu me zimbisa ngolo ya yawu.”

535 Ntangu yayi, na yina, Lumingu me luta beto bakaka, “Beto bika malongi ya ntete ya Klisto,” na kapu ya 6, beto tangaka yayi “ti beto kwenda na ya kulunga.” Mpe beto monaka ti bantu bubu yayi na mabuundu mingi, mutindu mosi na Branham Tabernacle mpe bayankaka, beto ke landa kaka mingi na kulongoka na yina me tala bantete ya Klisto: Yandi vwandaka Mwana ya Abraham, Yandi vwandaka Mwana ya—ya *Kingandi*, mpe nzila nyonso na kuvutukaka, balubutuku. Kasi Biblia ke tuba, “Ti beto bika na lweka bima yango, mpe beto kwenda na ya kulunga.”

536 Ntete beno fwana zaba malongi, mpe na manima beno fwana zaba bima nyonso yayi; na yina ti beto bika yawu na lweka, yandi tubaka, ya mvumbukulu ya bantu ya kufwa, kutentika maboko, bambotika, mpe bima nyonso yango ya kufwa ya Nzambi. Dyaka, ya—ya kele na ata Luzingu na yawu ve. Kasi dibuundu bubu yayi ke kwendaka kaka na bima yango, “Oh, beto ke kwikila na Bunzambi ya Klisto.” Yinga. Kieleka. “Beto ke kwikilaka na mbotika na kati ya maza.” Yinga. Kieleka. “Kutentika maboko.”

537 Paul ke tuba, “Beto ke sala nyonso yayi kana Nzambi pesa muswa. Kasi na ntuala ya nyonso yina, ti beto tula yawu na lweka ntangu yayi, mpe kukwenda na ya kulunga.”

538 Ntangu yayi, dibuundu lenda kuma ya kulunga ve na nzila ya ba-organisation. Yawu ke vwandaka ntama na Nzambi, ntangu nyonso, to ntama ya mosi na yankaka. Beto ke sala bikaku, beto ke kabuka beto mosi, na kumona mutindu beto kele ve na Lukwikilu. Kasi kuna na yina beto ke bika malongi yango ya ntete, kana beto kwenda na ya kulunga, kuna mwa bima yango ke kuma na mfunu mingi ve.

539 Beto ke kota na kati ya luzolo mosi, mpe beto ke mona ti mutindu kaka ti beto lenda vwanda ya kulunga kele kuvwanda na kati ya Klisto. Mpe beto vwandaka me tala kuna, landila malongi ya Biblia, ti mutindu beto ke kotaka na kati ya Klisto; ve na nzila ya mbotika na maza, ve na nzila ya kutentika maboko, ve na nzila ya malongi. “Kasi na nzila ya Mpeve mosi beto nyonso kele ya kubotika na kati ya Nzutu mosi mpe kukuma ya kulunga na nzila ya kutala mpasi ya Yandi.” Kuna, beto ke tala mutindu yankaka. Beto ke banza mutindu yankaka. Beto ke sala mutindu yankaka. Beto ke zinga mutindu yankaka. Ve samu ti ya kele kisalu to beto kele ya dibuundu, kasi samu na “zola yina Nzambi me tyamuna na bantima ya beto na nzila ya Mpeve-Santu,” yina ke sala beto bantu ya mbanza ya Kimfumu ya Nzambi, kuna ya kele na ata dénomination to bikaku ve na kati ya yawu. Beto nyonso kele Nzutu mosi ya nene.

540 Ntangu yayi beto me yilama samu na kukota na lesu ya suka yayi, na mwa ntangu fyoti. Kima mosi mu zola kuzwa awa, ya kele, ti, Paul na kuzonzaka na Buku, na kapu ya 7, to, ya 6, beto

ke tala awa ti beto ke kuma ya kulunga na Klisto. Kuna na nzila ya 13 ya kapu ya 6, kaka samu na mwa dibanza.

Samu ti ntangu Nzambi salaka nsilulu na Abraham, samu ti yandi zolaka zenga ndefi na ata muntu ya kulutila nene, yandi zengaka ndefi na yandi mosi,

Nzambi zengaka ndefi na Yandi mosi, samu ti Yandi zolaka zenga na ata muntu ya kulutila.

⁵⁴¹ Ntangu yayi beto zola kuvutuka. Beto baka Galates kaka mwa ntangu fyoti. Beno vutuka na Buku ya Galates, mpe beno baka Galates 3:16. Mpe beto ke tanga kaka awa ntangu fyoti, na yina Yandi zengaka ndefi.

Kasi na Abraham mpe nkuna ya yandi ti nsilulu kusalamaka. Yandi tubaka ve, Mpe na bankuna, mutindu ya mingi, kasi mutindu mosi, . . . na nkuna ya nge, yina kele Klisto.

⁵⁴² Ntangu yayi kana beno ke tala, na kutangaka yawu mbote ntangu yayi, na yina beno ke tanga.

. . . na Abraham mpe nkuna ya yandi (mosi) ti bansilulu (mingi) kusalamaka.

⁵⁴³ “Abraham mpe Nkuna ya yandi.” Ntangu yayi, Nkuna ya Abraham vwandaka mosi, ya vwandaka Klisto; na kutalana nte, na Isaac.

Kasi Abraham kuzwaka bana mingi. Yandi kuzwaka mosi nte yandi kuzwa Isaac, yina vwandaka lakisa foti ya kukondwa lukwikilu ya Sarah yina zolaka ti Anne kubuta mwana yango, na kubanzaka ti yandi vwandaka mingi ya kukula, mpe ti Nzambi na kubaluka mpe kusala nzila mosi yankaka na nzila yina Yandi silaka na kusala yawu.

⁵⁴⁴ Kasi Nzambi ke zitisaka nsilulu ya Yandi. Ata mutindu buzoba ya lenda monana, Nzambi ke kangamaka na nsilulu ya Yandi. Mpe Sarah banzaka ti ya lenda kuzwa Anna, to, Agar, mu zola tuba, musadi ya yandi ya kento, samu na kubuta bébé na Abraham, mpe yandi zolaka baka mwana. Mpe ya kumaka Ismaél, yina vwandaka nsende na nzutu, katuka kuna tii ntangu yayi. Ya kele dyaka nsende na nzutu, samu ti ya kele kuna basikaka ba-Arabe, mpe bawu kele mutindu yina ntangu nyonso.

⁵⁴⁵ Ntangu yayi, ntangu nyonso yina beno ke kondwa kukwikila Ndinga ya Nzambi ya kinkonga mpe ke baka mutindu mosi yankaka, ya ke vwanda nsende na nzutu ya beno kubanda kuna. Beno baka kaka yina Nzambi me tuba. Kana Yandi me tuba Yawu, yina kele kaka yina Yandi zola kutuba. Oh, nkembo na Nkumbu ya Yandi! Beno baka kaka Ndinga ya Yandi.

⁵⁴⁶ Ata yina ke meka na kuluta, na kutubaka, “Mbote, Yawu kieleka zola ve kutuba Yawu.” Yawu ke zola kaka kutuba yina Yawu ke tuba, ntangu Nzambi ke salaka nsilulu.

547 Ntangu yayi kana beto ke tala mbote.

... Abraham mpe nkuna ya yandi ti bansilulu kusalamaka...

Mosi vwandaka Nkuna, mosi, mpe yankaka vwandaka bansilulu. Ya kele na nsilulu ya kulutila mosi, mpe muntu ya kulutila mosi yina kele na kati ya Nkuna ya Abraham. Beno me mona? Ya kele na Nkuna mosi, kasi bantu mingi na Nkuna yayi. Beno me mona? Yawu vwandaka kaka ve na Abraham, to kaka na Isaac. Kasi... Yawu vwandaka samu na Nkuna nyonso ya Abraham. Bansilulu kusalamaka samu na mosi mpe konso nkuna mosi ya Nkuna yina. Beno me bakula yawu?

548 Na yawu, beto, na kuvwandaka ya kufwa na Klisto, landila Masonuku, beto ke kuma Nkuna ya Abraham mpe kele bibyadi landila nsilulu. Ve na kukumaka ya dibuundu, to na kusalaka bima ya kufwa, to—nyonso yankaka. Kasi na kuvwandaka ya kubutama na Mpeve ya Klisto, beto kele Nkuna ya Abraham, mpe ke vukana bibyadi na Yandi na Kimfumu.

549 Na yina beto landila, na kutanga, kuna, kaka mwa fyoti na ntwala ntangu yayi, “Nzambi na kuzengaka ndefi.” Ntangu yayi nzila ya 17 ya kapu ya 6.

Na yina Nzambi, na kuzolaka kulakisa na bunene mingi...

... Nzambi, na kuzolaka kulakisa na bunene mingi na bilandi ya nsilulu kukondwa nsobolo ya lukanu ya yandi, me siamisa yawu na kuzengaka ndefi:

550 Oh, beto pema kaka awa baminuti fyoti. “Nzambi zolaka mingi.” Ve ti Yandi vwandaka ya kukwika, kasi samu na kusala yayi kima ya kieleka.

551 Ntangu yayi, beto talaka yimeni ti Nzambi kumaka nsuni, zingaka na kati-kati ya beto, mutindu ti Yandi monisamaka Yandi mosi na ntwala ya yinza. Ntangu Yandi monaka kento na kati ya kindumba, tubaka, “Mu ke—Mu ke fundisa nge ve. Kwenda, sumuka dyaka ve.” Ntangu Yandi monaka bambevo, Yandi salaka kaka mutindu Yandi zolaka sala, samu ti Yandi vwandaka Nzambi, mpe Yandi—Yandi belusaka bambevo. Yandi vumbulaka bantu ya kufwa. Yandi lemvokilaka masumu. Ata mutindu bawu vwandaka, mpe lutangu, mpe mutindu bawu vutukaka manima, Yandi lemvokilaka bawu, na mutindu nyonso, kana bawu vwanda zola kukwiza mpe kulomba.

552 Ntangu yayi beno tala. Kana Nzambi salaka mutindu mbala mosi na dyambu mosi, mpe kana dyambu mosi yina kusalama dyaka, Yandi fwana sala na mbala ya zole mutindu Yandi salaka na mbala ya ntete kana ve Yandi kele ya kudedama ve. Beno me mona? Ata mutindu yimbi beno kele na kati ya disumu, mutindu beno lenda vwanda ya kudyama, Yandi fwana sala na beno mutindu Yandi salaka na kento yina kubwaka kana ve

Yandi salaka yimbi kuna. Nkadulu ya Nzambi kele Bumuntu ya Yandi, mpe yina Yandi kele na nkadulu ya Yandi ke tuba Bumuntu ya Yandi.

553 Mpe ya kele mutindu beno kele, na nkadulu ya beno ya luzingu, ya ke tuba yina beno kele. Mutindu beto talaka mpe zonzilaka, leso mosi to zole me luta, bantu ya ba-Méthodiste vwanda zola kutuba, “Ntangu beno ke boka, beno me kuzwa Yawu.” Bantu ya Pantekote ke tuba, “Ntangu beno ke zonza na bandinga, beno me kuzwa Yawu.” Bantu yina ke tekita me tuba, “Ntangu beno ke tekita, beno me kuzwa Yawu,” Bantu yina ke tekita ya Pennsylvanie. Mpe beto monaka ti bawu nyonso vwandaka na foti. Luzingu ya beno ke tuba Yawu. Bumuntu ya beno ke tuba yina beno kele. Muntu ke zabanaka na bisalu ya yandi, mpe na nyonso luzingu ya beno kele.

554 Beno me kuwaka dyambu ya ntama yayi, “Luzingu ya beno ke zonza ngolo mingi ti, mu lenda kuwa bandinga ya beno ve.” Na yawu nyonso yina beno kele, beno kele. Luzingu yina beno ke zinga ke lakisa mutindu ya mpeve yina kele na kati ya beno.

555 Mpe na yina beno lenda landa kima ya yimbi, to, kulanda kima ya mbote, mu lenda tuba. Beno lenda mekula Muklisto. Kasi kuna, na manima ya mwa ntangu, ke kwiza ntangu kisika kizitu ke tulama, kuna ya ke lakisa yina beno kele. Ba ke zabaka ngolo ya muniololo na singa ya yawu ya pete-pete.

556 Ntangu Klisto Mwana ya Nzambi kutulamaka na kuteza, ya lakisaka yina Yandi vwandaka. Kieleka. Ntangu ba me tula beno na kuteza, ya ke lakisa yina beno kele. Luzingu ya beno ke lakisa ntangu nyonso yina kele na kati ya beno. Na manima ya mwa ntangu, beno vwanda ya kukwikama ti masumu ya beno ke simba beno ve. Mpe ya kele yina beto ke na kumekaka na kutuba.

557 Yesu ke tuba, na Santu Jean 5:24, “Yandi yina ke kuwa,” ve yandi yina ke tekita, yandi yina ke zonza, yandi yina . . . “Yandi yina ke kuwa Ndinga ya Munu, mpe ke kwikila na Yandi yina me fidisa Munu, kele na Luzingu ya Kukonda nsuka, mpe ke luta ata mbala mosi ve na lufundusu; kasi me luta lufwa na Luzingu.”

558 Ya kele lukwikilu ya beno. Mpe lukwikilu ya beno, yina beno ke tuba na bikoba ya beno, ke monikisa kima na bantu yina lenda kuwa, kasi luzingu ya beno kele mwasi na ntwala ya bantu nyonso. Na yawu, ata mutindu beno ke meka na kusala *yayi* mpe kusala *yayi*, ya ke tambula ata fyoti ve. Ya fwana vwanda na kati ya beno. Yina kele kieleka ntima ya dyambu ya movimba. Lukwikilu ya beno mosi na Klisto yina vumbuka na lufwa, mutindu Mvulusi ya beno; ti Yandi kele na diboko ya kibakala ya Nzambi, na kusalaka na kisika ya beno na suka yayi, mutindu beno ke na kusalaka na kisika ya Yandi awa na yisi mutindu mbandi. Mbandi ke salaka na kisika ya muntu, ke telama samu na beno mutindu mbandi. Mpe mutindu luzingu ya beno ke lakisa awa yina kimbangi ya beno kele na Klisto, ya

ke lakisa kuna mpe ya ke lakisa awa. Mpe Yandi kele na zulu kuna, mutindu yina Yandi kele samu na beno, ke lakisa bisika nyonso zole kuna mpe awa. Na yawu beno kele. . . Na lukwikilu ya beno, beno kele ya kuvuuka, mpe na yina kaka. Na yawu, ba-sensation, ba-emotion, bakuwa nyonso, kele na ata kisika na Yawu ve. Ntangu yayi, ve. . .

⁵⁵⁹ Ntangu yayi, beno banza yimbi ve, ti mu ke kwikilaka ve na ba-emotion yayi. Kieleka. Kasi yina beto ke landaka kaka ntangu yayi, na kumekaka na kukotisa na bayintu ya bantu yayi na kilumbu yayi, ya kele ve ba-emotion. Dyabulu me baka bima yango mpe me dasuka na bantu, na kubikaka bawu kutelemisa nsuka ya bawu ya Seko na zulu ya emotion. Kuboka, kuzonza na bandinga, kukwenda na dibuundu konso Lumingu, kusala mutindu Muklisto, yina ke pesa ata kimbangi mosi ve kilumbu yina. “Kana ti muntu kubutuka mbala zole.” Mpe luzingu ya beno ke lakisa yina kele na kati ya beno, beno me mona, ba-emotion ya beno ve.

⁵⁶⁰ Beno lenda vwanda na menga na maboko ya beno, beno lena zonga na bandinga, beno lenda belusa bambevo, beno lenda katula myongo na lukwikilu ya beno, mpe beno kele ntete kima mosi ve. Ya ntete ya Corinthiens 13. Beno me mona? Ya fwana vwanda kima ke salama na nzila ya Mbutukulu yina ke katuka na Nzambi, mpe Nzambi ke nata Mbutukulu ya malu-malu na kati ya beno, mpe ke pesa beno kitini ya Yandi mosi. Kuna bima yango kele. Beno kele kivangu ya malu-malu. “Na bawu Mu ke pesa Seko.”

⁵⁶¹ Beto talaka mpova “Seko.” *Ntangu nyonso* kele “kati-kati ya ntangu mosi.” Ya *Seko* kele kukondwa nsuka, kukondwa nsuka mpe kukondwa nsuka, kasi ya kele kaka na ya Seko mosi. Mpe beto monaka ti beno ke kuzwaka Luzingu ya Kukonda nsuka, mpe mpova na Grec kele *Zoe*, yina zola kutuba “Luzingu ya Nzambi.” Mpe beno ke kuzwa kitini ya Luzingu ya Nzambi, yina ke sala beno mwana ya Nzambi ya kimpeve, mpe beno kele kaka ya kukondwa nsuka mutindu Nzambi kele ya kukondwa nsuka. Beno kele na ata nsuka ve, ata kisika ya kusuka ve, samu ti beno kele na ata kisika ya kubanda. Kima nyonso yina kele na mbandukulu kele na nsuka, mpe yina ya kukondwa mbandukulu kele na ata nsuka ve.

⁵⁶² Mutindu beto zola Ndinga yango ya ntalu! Wapi mutindu Muklisto zolaka kangama na Lukwikilu yina pesamaka mbala mosi na basantu, mpe kuvwanda ve kidi-kidi, kisika na kisika, mpe kukuma ya mabuundu mingi. Dibundu nyonso beno zola kukuma mambele kele mbote mingi, kana kaka beno vwanda Muklisto. Kasi ntete beno tula kima ya ntete, yina kele Mbutukulu yango yina ke sala beno mpangi ya Nzambi, mutindu Nzambi kele mpangi na beno.

563 Yandi kumaka mpangi, samu ti Yandi vumbula beno. Ntete Yandi vumbula beno, Yandi fwana pesa beno Luzingu ya Kukonda nsuka. Na yina Nzambi zolaka kuma mpangi, samu na kubaka lufwa, na vumbula beno. Na yina beno fwana kukuma mpangi na Yandi, samu na kukota na mvumbukulu. Beno me mona yinki ya kele? Ya kele kaka nsobolo. Nzambi me kuma beno, ti beno lenda kuma Nzambi. Beno me mona? Nzambi kumaka kitini ya beno, na nsuni, samu ti beno na nzila ya lemvo ya Yandi kukuma kitini ya Yandi, kaka yina, samu na kuzwa Luzingu ya Kukonda nsuka.

564 Kaka kizizi ya kitoko, mpe, oh, beto zola yawu.

Ntangu yayi, *Nzambi, na kuzolaka kulakisa na bunene mingi...*

565 Yandi vwandaka ya kukwika ve, kasi Yandi vwandaka zola. Mu kele na kyese mingi na yawu, beno ve, ti Nzambi ya beto zolaka? Beno tala. Yinki kana Yandi—yinki kana Yandi vwandaka ve na mvibudulu? Yinki kele bambuma ya Kimpeve? Zola, kyese, lukwikilu, ngemba, mvibudulu. Ya kele kitini ya Nzambi yina kele na kati ya beno. Mpe na kulenda kukanga ntima, kunata bizitu ya mosi na yankaka. Na kulemvokilaka mosi na yankaka, mutindu Nzambi lemvokilaka beno samu na luzolo ya Klisto. Mpeve ya Nzambi na kati ya beno ke sala beno mutindu yina. Mpe kuna na yina Nzambi vwandaka awa na zulu ya ntoto mpe kumaka beno, kumaka disumu, ti Yandi bakaka disumu ya beno, nataka yawu samu na beno mpe futaka kitumbu ya beno samu na yawu. Nzambi kele na mvibudulu, ke nataka bizitu ya beto.

566 Mpe dyaka Yandi kele Nzambi ya mbote. Kana beno zola, bima yankaka na mutindu ya beno, beno zaba, Nzambi kele mbote mingi na kusala yawu. Yandi ke zolaka ku—kusala beno kilengi. Yandi ke zolaka... Yandi—Yandi kele zola, mpe zola ya Yandi ya nene ke kwikaka Yandi na kufukama bantangu yankaka, samu na kubika beno kuzwa bima yina beno zola.

567 Beno tala Thomas, na manima ya mvumbukulu. Thomas vwanda kwikila ve. Oh, yandi kele na bana mingi bubu yayi. Kasi Thomas tubaka, “Ve. Ve. Mu fwana kuzwa kimbangi mosi. Mu fwana tula maboko ya munu na lweka ya Yandi, mpe na ya Yandi... misapi ya munu awa na maboko ya Yandi, ntete mu kwikila Yawu. Mu, mu ke kipe ve yina beno ke tuba.” Beno me mona, Yandi vwandaka na ngaanda ya nzila ya Masonuku, kaka kuna. Beno fwana kwikila Yawu. Na yawu yandi tubaka, “Mu fwana kuzwa mutindu mosi ya kimbangi, samu na kumonisa Yawu.”

568 Mpe Yesu monikaka, Yandi kele mbote, “Kwiza, Thomas, kana ya kele yina nge zola, mbote, nge yandi yayi. Nge lenda kuzwa yawu.”

569 Ya kele mutindu beto kele. Beto ke tubaka, “Mfumumu, mu fwana zonza na bandinga. Mu—mu fwana boka. Mu fwana . . .”

570 “Oh, beno kwenda na ntwala, Mu ke bika beno kuzwa yawu.” Yandi kele mbote.

571 Na yawu yandi tulaka maboko ya yandi na lweka ya Yandi, na yina yandi tubaka, “Oh, ya kele Mfumumu ya munu mpe Nzambi ya munu.”

572 Yandi tubaka, “Awa, Thomas, nge me kwikila katuka yina nge me mona. Kasi wapi mutindu nene kele musendo ya bawu bayina me kuzwa ata kimbangi ve mpe kasi me kwikila Yawu!” Beno bawu yayi. Ya kele kisika beto fwana kuma. “Wapi mutindu nene kele musendo ya bawu bayina monaka kima ve kasi dyaka kwikilaka Yawu.” Ya kele na kusala ya lukwikilu, ti beto ke ndimaka Yawu.

573 Ntangu yayi, mu ke kwikilaka na bidimbu ke landaka mikwikidi, kasi beto tula ntete bima ya ntete. Beno lenda kuzwa bidimbu, kukondwa Yayi. Paul tubaka ti beto lenda. Yandi tubaka, “Mu lendaka zonza na bandinga mutindu bantu mpe Bawanzio; mu kele kima mosi ve. Mu lenda katula myongo na lukwikilu ya munu; mu kele kima mosi ve. Mu lenda bakula Biblia, na mutindu mu lenda zaba mansweki nyonso ya Nzambi; mu kele kima mosi ve.” Beno me mona, yina kele makabu ya Mpeve-Santu, kukondwa Mpeve-Santu.

574 Mpeve-Santu kele Nzambi. Nzambi kele zola, kyese, ngemba, kukanga-ntima, kusalasana, mvibudulu. Yina kele Mpeve ya Nzambi. Ya kele yina Nzambi ke vumbula na bilumbu ya nsuka, na nzila ya Mpeve yina.

575 Ntangu yayi, “Na kuzolaka ve . . .”

. . . Nzambi, na kuzolaka mingi kulakisa na bunene mingi na bibiyadi ya nsilulu . . .

. . . Nzambi, na kuzolaka mingi . . . samu na kulakisa . . . badifwa . . .

Banani kele bibiyadi? “Beto, na kuvwandaka ya kufwa na Klisto, me kuma Nkuna ya Abraham, mpe kele bibiyadi.” Oh, ya ke na kukota mbote? Beto kele bibiyadi ya Kimfumumu ya Nzambi, na nzila ya nsilulu ba me zenga ndefi. Nzambi zolaka zenga ndefi ve. Ndinga ya Yandi kele ya kulunga. Kasi Yandi zengaka ndefi, mpe, na nzila ya Yandi mosi, samu ti ya vwandaka ve na muntu ya kulutila.

576 Na yina beto ke landila na kutanga, kaka mwa ntangu fyoti, beno kuwa.

. . . nsilulu kukondwa nsobolo ya lukanu ya yandi, me siamisa yawu na kuzengaka ndefi:

577 “Kukondwa nsobolo,” yina lenda soba ve. Nzambi lenda soba ve. Yandi fwana vwanda kaka mutindu mosi. Mpe kana Nzambi

belusaka muntu mosi ya kubela, Yandi lenda ata mbala mosi ve kusoba mutindu ya Yandi. Kana Nzambi lemvočila musumuki mosi, ndumba mosi, Yandi lenda soba ata mbala mosi ve mutindu ya Yandi. Kukondwa nsobolo, Ndinga ya Nzambi yina ke sobaka ve. Nzambi tubaka, na kisika mosi, “Mu kele Mfumu Yandi yina ke belusaka bimbevo ya nge nyonso.” Yandi fwana vwanda na Yawu, samu ti Yandi kele ya kukondwa nsuka. Yandi zabaka nsuka katuka mbandukulu.

⁵⁷⁸ Ntangu yayi, mu lenda tuba, “Mu ke sala *yayi*.” Mpe Biblia ke tuba, beto fwana tuba, “Kana Mfumu zola.” Samu ti, mu kele yina ke kufwa. Mu zaba ve. Bantangu yankaka mu fwana vutula dyambu ya munu, kasi Nzambi lenda vutula ya Yandi ve. Yandi kele Nzambi.

⁵⁷⁹ Mpe Yandi ke lombaka kaka kima mosi, “Kana nge lenda kwikila.” Oh, la la! “Kana nge lenda kwikila, nyonso lenda salama.” “Kana nge lenda kwikila,” kaka yina. “Nge, kana nge lenda,” yawu yina kyuvu. Kasi kyuvu kele ve na Ndinga ya Nzambi, samu ti, kukondwa nsobolo ya Yandi, Yandi lenda soba ve. Mutindu ya kele mbote mingi!

⁵⁸⁰ Ntangu yayi beno kuwa, na yina beto ke landila na kutanga na yisi.

Samu ti na bima zole ya kukondwa nsobolo, na yina ya kele na lenda ve samu na Nzambi na kuvuna, . . .

Lenda ve! Kukondwa kulenda mpe kukondwa nsobolo kele na kutala mpova mosi; kulenda soba ve, kulenda ningana ve. Ya fwana vwanda ntangu nyonso mutindu mosi. Lenda soba ve, kukondwa nsobolo mpe kukondwa kulenda.

Mpe na zole, na bima zole ya kukondwa nsobolo, na yina ya vwandaka na lenda ve samu na Nzambi na kuvuna, . . .

“Beto kele na bima zole?” Yinga. Ya ntete, Ndinga ya yandi me tuba ti Yandi ke sala yawu. Ya zole vwandaka ndefi ya Yandi ya kuzenga ndefi na zulu ya yawu, ti Yandi ke sala yawu. Oh, la la!

⁵⁸¹ Wapi mutindu ya bantu ke vwanda? Samu na yinki beto ke vwanda kidi-kidi mpe ke kima bisika nyonso, mpe kubaka bima ya yinza mpe kusala mutindu Buklisto ya malu-malu ya mutindu ya 1957 yayi? Beto zola kuvwanda mutindu ya ntama yina ke bakaka Nzambi na Ndinga ya Yandi, mpe kubokila bima yango yina vwandaka ve, mutindu ti ya kele. “Kana Nzambi tubaka yawu, Yina ke sukisa dyambu.”

⁵⁸² Abraham, yandi yina nsilulu kupesamaka, na yandi mpe na Nkuna ya yandi, yandi bokilaka bima yina vwandaka ve, mutindu ti ya vwandaka. Samu ti, Yawu vwandaka nsilulu ya Nzambi, na kuzabaka ti Nzambi lenda vuna ve. Yandi silaka yandi yawu, mpe yandi kwikilaka Yawu. Mpe mutindu bamvula

vwandaka luta, mpe nsilulu monanaka vwandaka baka ntangu mingi, landila meso ya kimuntu, Yawu vwandaka belama samu na Abraham.

⁵⁸³ Na kisika ya kulemba, mpe kutuba, “Mbote, ya lenda vwanda ti ya kele ve na kima mutindu kubeluka ya Kinzambi. Ya lenda vwanda kaka ti mu kwe- . . . Ya lenda vwanda ti ya kele ve na kima mutindu. Ya lenda vwanda ti mu kele na foti na kubanza ya munu nyonso.” Kuna, yina ke lakisa kima mosi, ti beno me butama ntete mbala ya zole ve. “Samu ti ya kele . . .”

⁵⁸⁴ Beto talaka yawu Lumingu me luta, ya kele kaka manima fyoti na ntwala ya kapu. “Samu ti ya lenda salama ve samu na muntu yina mbala mosi mekaka makabu ya Mazulu mpe nyonso, na kubwa, na kuvutuka yandi mosi dyaka na kusoba.” Kieleka, na nyonso ya lenda salama ve!

Samu ti yandi yina *kele ya kubutama na Nzambi* ke salaka ve mpe *lenda sala ve disumu; samu ti nkuna* ya Nzambi ke zingaka *na kati ya yandi: mpe yandi lenda sumuka ve, . . .*

Nkuna ya Nzambi kele Ndinga ya Nzambi. “Lukwikilu ke kwizaka na nzila ya kuwa, kuwa Ndinga, ‘Munkayulu kusalamaka. Nyonso yimeni.’”

⁵⁸⁵ Ntangu yayi, kana beno sala yimbi, Nzambi ke sala beno kufuta samu na yawu. Kasi kana beno sala, beno kele na foti, beno sala yawu ve na luzolo ya beno. Kapu ya 10, nzila ya 47, mu banza, “Samu ti kana beto sumuka na luzolo ya beto na manima beto me kuzwa luzabu ya Kieleka.” Kasi na manima beno me Butama mbala mosi, beno me kuzwa Kieleka; luzabu ya Yawu ve, kasi beno me ndima Kieleka mpe Yawu me kuma kieleka. Mpe beno kele mwana ya Nzambi, samu na ntangu mpe ya Seko. Nzambi zengaka ndefi ti Yandi ke sala yawu.

⁵⁸⁶ Yesu tubaka, “Yandi yina ke kuwa Bandinga ya Munu, mpe ke kwikila na Yandi yina fidisaka Munu, kele na Luzingu ya kukondwa nsuka, mpe Mu ke vumbula yandi na kilumbu ya nsuka. Yandi ke kwiza ata mbala mosi ve na Lufundusu. Yandi me luta lufwa na Luzingu.” Ntangu yayi na kuzenga ndefi mutindu yina, “Nzambi zolaka ti beto kuzwa Yawu.”

⁵⁸⁷ Ntangu yayi beno tala mbote yina yandi ke tuba awa, Paul na kuzonzaka na dibuundu.

. . . kele *na lenda ve samu na Nzambi na kuvuna, beto fwana lenda kuzwa kubomba ya nene, . . .*

Ve, “Mbote, kana ba-Baptiste sala munu mbote ve, mu ke kwenda na ba-Méthodiste.” Beno me mona?

. . . beto ke *kuzwa kubomba ya nene, beto bayina me kimaka na kiswamunu samu na kuwanda ya kukangama na zulu ya kivuvu yina vwandaka na ntwala ya beto:*

588 Ntangu yayi beto tanga nsuka.

Yina kivuvu kele na beto mutindu kizundu ya moyo, . . .

Kivuvu, ndefi ya Nzambi ya kuzenga ndefi, kele na beto mutindu kizundu ya moyo, na zole kieleka mpe ngolo, mpe yina ke kotaka tii kuluta vwale;

589 Beto zonzila kaka mwa ntangu fyoti na “vwale.” Beto talaka yawu mbote mingi ve nkokila ya Lumingu yina me luta.

590 “Na kati ya vwale.” Vwale kele nsuni. Vwale kele yina ke kangaka beto na kumona Nzambi, kizizi na kizizi, na dibuundu yayi. Vwale kele yina ke kangaka beto na kumona Bawanzio na bisika ya bawu na suka yayi, ya kutelama pene-pene ya bakiti. Vwale kele yina ke kangaka beto na kumona Yandi. Beto kele ya kubumbama na manima ya vwale, mpe vwale yango kele nsuni. Beto kele bana ya babakala mpe bana ya bakento ya Nzambi, beto kele na kati ya Mvwandulu ya Nzambi, “Bawanzio ya Nzambi ke vwandaka pene ya bayina ke zitisaka Yandi.” Beto kele na kati ya Mvwandulu ya Nzambi, ntangu nyonso. “Mu ke bika nge ata mbala mosi ve, mpe Mu ke losa nge ve. Mu ke vwanda na nge ntangu nyonso, tii na nsuka.” Kasi vwale kele nsuni, ya kele yina ke kangaka beto na ngaanda ya Mvwandulu ya Yandi. Kasi na nzila ya moyo, Mpeve, na lukwikilu ya beto beto zaba ti Yandi ke na kutalaka mbote na beto. Yandi kele ya kutelama pene-pene ya beto. Yandi kele awa ntangu yayi.

591 Kuna na Dothan, na suka mosi, profete mosi ya kiboba vwandaka ya kuzunga na basoda mpe kisadi ya yandi basikaka mpe tubaka, “Oh tata, yinsi ya muvimba kele ya kuzunga na banzenza.”

592 Mpe Élie me telama, mpe me tuba, “Oh, mwana, beto kele na mingi na beto kulutila yina kele na bawu.”

593 Mbote, yandi me bweta meso ya yandi mpe me tala bisika nyonso. Yandi monaka kima mosi ve.

594 Yandi tubaka, “Nzambi, mu zola ti Nge fungula meso ya yandi, katula vwale.” Mpe ntangu vwale kubwaka na meso ya yandi, na kizunga ya profete ya kiboba yango vwandaka na bipusu ya tiya, myongo vwandaka na Tiya na Bawanzio mpe bipusu. Beno bawu yayi.

595 Oh, na yina Guéhazi lendaka kutuba, “Mu—mu me bakula ntangu yayi.” Beno me mona, vwale kubwaka. Ya kele yina ke salaka ndilu.

596 Yawu yayi. Beno simba yawu mbote. Vwale kele yina ke kangaka beto na kuzinga mutindu beto zolaka. Vwale kele yina ke kangaka beto na kusala bima yina beto kieleka zolaka sala. Mpe Nzambi kumaka ya kufuka na kati ya nsuni, mpe vwale kupasukaka na bitini zole. Mpe Nzambi kumaka Nzambi dyaka, mpe Yandi vumbulaka vwale yina Yandi bumbamaka Yandi mosi

na kati. Ya kele mvumbukulu ya Mfumu Yesu. Na kumonisaka na beto ti, na vwale yayi yina beto kele ya kubumbama ntangu yayi na kati, na lukwikilu beto ke kwikila Yawu mpe ke ndima Yawu. Mpe ntangu vwale *yayi* ke pasuka na bitini zole, mu ke kwenda na kati ya Mvwandulu ya Yandi na kivuvu yayi, na kuzabaka ti, “Mu zaba Yandi na ngolo ya mvumbukulu ya Yandi.” Na Nkwizulu ya Mfumu Yesu, vwale yayi ke vumbuka dyaka, na mutindu ya kulunga, tii mu ke tambula mpe ke zonga na Yandi mutindu Mvulusi ya munu mpe Nzambi ya munu, ntangu Yandi ke baka kiti ya kimfumu ya David. Mpe beto ke zinga kukondwa nsuka na vwale yayi na manima ya me kuma ya kulunga, kasi vwale yayi kele na disumu na kati ya yawu. Ya kele ve ata mutindu. . . Beno banza ata mbala mosi ve na nzutu yango ya nkembo na ntoto yayi. Ya fwana kufwa, mutindu mosi moyo ya beno fwana kufwa, samu na kubutama mbala zole.

⁵⁹⁷ Na kati ya kulunga, ve kudya bangombe, mpe kusala *yayi*, mpe kukumisa nzutu ya kulunga, beno ke kuzwa yawu ata mbala mosi ve. Mpe beno fwana bika *yayi*, mpe kusala *yayi*, mpe kusala *yayi*, mpe kusala *yayi*, yina kele musiku. Yina kele ya bantu yina ke kangamaka na misiku. Beto ke kwikilaka ve na mitindu ya kukangama na musiku ya mpulusu. Beto ke kwikilaka Yawu ti na nzila ya lemvo beto kele ya kuvuuka. Mpe ya kele beno ve. Beno kele na kima ve ya kusala na yawu. Ya kele nsodolo ya Nzambi yina ke salaka yawu. “Muntu ve lenda kwiza na Munu kana Tata ya Munu kubenda yandi.” Ya kele kieleka. Mpe Yandi. . . Nyonso yina Yesu kwizaka na kusala vwandaka kuzwa bayayi yina Tata zabaka ntete; mpe solaka bawu ntete mbandukulu ya yinza na kukuma bana ya babakala mpe bana ya bakento ya Nzambi. Amen. “Ve yandi yina ke kima, to yandi yina ke zola, kasi Nzambi yina ke tala kyadi.” Nzambi kele yina ke salaka yawu. Beno lenda ve kusala matalana, ata fyoti ve. Ya kele ve na kima yina beno ke sala. Nzambi, na nzila ya lemvo, vuukisaka beno; beno ve, beno mosi. Kana beno sala, beno ke kuzwa kima ya kusala matalana. Kasi beno kele na kima ve ya kusala matalana. Nkembo nyonso ke kwenda na Nzambi. Ya kele Yandi. Na yina Yandi ke pesa beno kivuvu ya kieleka, “Yandi zengaka na ndefi, ti ya lenda salama ve ti bana ya yandi kuzimbana.”

⁵⁹⁸ Ntangu yayi, bawu ke kuzwaka kitumbu na kusalaka yimbi. Beno ke buka yina beno kunaka. Beno ke kuzwa yawu. Beno banza kaka awa ve ti beno ke basika ke sumuka, mpe ke landila na yawu. Kana beno sala, mpe kuzwa mutindu yina, ya ke lakisa ti ata mbala mosi ve beno me butamaka mbala zole. Beno me bakula yawu? Kana beno kele dyaka na nsatu na kati ya beno, ya kusala yimbi, na yina beno kele dyaka yimbi. Beno me mona? “Samu ti Yandi me kumisa ya kulunga, kukondwa nsuka, bayina kele. . . Mpe baniama yango na yisi ya Ngwisani ya Ntama, na yisi ya bilumbu ya musiku, yina ba vwanda pesa konso mvula,

ntangu nyonso, zolaka katula ata mbala mosi ve disumu.” Kasi ntangu beto ke tula maboko ya beto na zulu ya yintu ya Yandi, mpe ke funguna masumu ya beto mpe kele ya kubutama mbala zole na Mpeve ya Nzambi, beto kele dyaka ve na nsatu ya disumu. Disumu me zimbana na beno. Ya kele samu na ntangu mpe na Seko.

⁵⁹⁹ Beno ke sala bafoti. Beno ke kubwa. Beno ke sala yimbi na luzolo ya beno. Beno ke basika ntangu yankaka mpe ke sala mambu. Yina zola ve kutuba ti beno me zimbana. Ya zola kutuba ti beno ke kuzwa kitumbu.

⁶⁰⁰ Mwa mwana ya munu ya bakala, bambala mingi, bana ya munu, ke sala mambu. Ya beno, mpe. Ti beno . . . Bawu zaba ti ya ke telemina misiku ya beno—ya beno. Mpe bawu zaba yinki ya kuingila ntangu bawu ke sala yawu. Bawu ke kuzwa kitumbu samu na yawu, bantangu yankaka ya mbote yina. Kasi ba kele dyaka bana ya beno. Kieleka.

⁶⁰¹ Ya lenda salama ve ti muntu yina zimbana dyaka, na yina mbala mosi me butama ya Luzingu ya Kukonda nsuka. Nzambi kele ve mutindu mupesi ya Inde. “Yandi yina ke kuwa Bandinga ya Munu, mpe ke kwikila na Yandi yina me fidisa Munu, kele na Luzingu ya kukondwa nsuka; mpe ke kwiza ve na Lufundusu, kasi me luta lufwa na Luzingu. Mu ke vumbula yandi na bilumbu ya nsuka.” Yina kele nsilulu ya Nzambi.

⁶⁰² Ntangu yayi kana beno landila na kukwenda, beno tuba, “Oh, mbote, na yina mu lenda sala kaka . . .” Mu ntangu nyonso ke salaka yina mu zola kusala. Kasi kana beno kele Muklisto, beno ke zola ve kusala kima yina kele yimbi, samu ti Luzingu ya kieleka na kati ya beno, lufulu ya kieleka. Kana beno zola kusala kima ya yimbi, ya ke lakisa kima ya yimbi yina kele na kati *awa*. “Wapi mutindu lenda basika na yintu ya maza mosi maza ya ndudi mpe ya mbote?”

⁶⁰³ Na yawu beno me vilakana na mutindu mosi ya emotion, to na *kima yankaka* ya ngitukulu ya sensation: Beno zimbana yawu! Beno vutuka na autel mpe beno tuba, “Nzambi, katula luzingu ya munu ya ntama ya masumu, mpe tula munu na mutindu mosi ti nsatu ya munu ya muvimba . . .”

“Yandi yina me butama na Nzambi ke salaka disumu ve.” Ya kele kieleka. Yandi kele na ata nsatu ya kusala mutindu yina.

⁶⁰⁴ Kieleka, dyabulu ke sala yandi mutambu *awa* mpe *kuna*, kasi na luzolo ya yandi ve. Biblia me tuba mutindu yina. Dyabulu ke sala yandi mutambu, ntangu yayi mpe na ntwala. Kieleka, yandi ke sala. Yandi mekaka na kulosa mutambu na Mfumu ya beto Yesu. Yandi salaka na Moise, mpe bwilaka yandi. Yandi salaka na Pierre, mpe bwilaka yandi. Yandi salaka na mingi, kasi . . . Pierre mpe kumangaka Yandi, kasi na manima yandi kwendaka mpe dilaka na mawa. Ya vwandaka na Kima mosi na kati ya yandi.

605 Ntangu ba bikaka yembe kubasika na nzasa . . . Nkwankwa basikaka, yandi bokaka bisika nyonso. Yandi vwandaka na kati ya nzasa mbote, kasi ntangu yandi basikaka, nkadulu ya yandi vwandaka mutindu yankaka. Yandi lendaka na kudya bamvumbi nyonso ya baniama ya ntama yina yandi zolaka, mpe kusepela. Samu na yinki? Yandi vwandaka nkwanwa, na kubanda. Yandi vwandaka charognard. Yandi vwandaka mbote ve. Yandi vwandaka kibulu ya luvunu yina vwandaka ya kuvwanda na kintala na yembe, kaka nene mutindu yembe vwandaka. Yandi lendaka na kupumbuka kisika nyonso yembe lendaka na kupumbuka. Kasi yandi zolaka kudya madya ya mbote kaka mutindu yembe vwanda kudya. Mpe na manima yandi lendaka kudya madya ya kupola, yina yembe vwanda lenda ve kudya. Samu ti, yembe kele ya kuyidika mutindu yankaka. Yandi kele ya kusala mutindu yankaka. Yandi kele yembe. Mpe yembe lenda nienia ve madya ya kupola, samu ti yandi kele na ata bile.

606 Mpe muntu yina kele ya kubutama na Mpeve ya Nzambi ke kumaka yembe ya Nzambi, na nkadulu ya yandi, na nsobolo ya yandi, na kikalulu ya yandi. Yinga, tata. Beno tula mpeve ya—ya yembe na nkwanwa, yandi ke vwanda ata mbala mosi ve na zulu ya mvumbi ya kibulu ya kufwa. Kana yandi kubwa kuna na foti, yandi kieleka ke katuka kuna na nswalu. Yandi ke lenda ve yawu. Mpe muntu yina me butama na Mpeve ya Nzambi, ke lenda ve na kukanga-ntima. Yandi lenda kubwa kilumbu na nganda, kasi yandi ke basika kuna na nswalu. Kento mosi lenda kusala yandi mutambu, ke nata yandi na kubaluka, kasi yandi ke balula yintu ya yandi dyaka. Yandi ke basika kuna na nswalu. Samu na yinki? Yandi kele yembe. Ya kele kieleka. Beno ke vuna yandi ve, samu ti yandi zaba. “Mameme ya Munu zaba Ndinga ya Munu, mpe nzenza bawu ke landa ve.” Yandi kele yembe na kubanda. Ya kele yina mu ke na kuzonzila, na kima ya kieleka yina ke kangama na kati kuna.

607 Beno tala mbote ntangu yayi. “Nzambi zengaka ndefi.” Oh, ya . . .

*Yina kivuvu kele na beto mutindu kizundu ya moyo,
na zole . . . ngolo, mpe yina ke kotaka tii—tii yina kele
kuluta vwale;*

608 “Vwale.” Nzambi kulukumakaka, ya kufuka na kati ya nzutu. Samu na kusala yinki? Samu na kulakisa Yandi mosi. Yandi zolaka bumbama, samu ti beto lenda ve na kumona Yandi. Mpe Yandi bumbamaka na manima ya vwale. Mpe vwale vwandaka Nani? Yesu. “Munu ve ke salaka bisalu, Tata ya Munu,” tubaka Yesu. “Tata ya Munu ke zingaka na kati ya Munu. Mu ke sala. Tata ke sala, mpe Mu ke sala dyaka bubu yayi.” Awa Yandi kele mutindu Yandi yina ya kufuka, ke na kutambulaka na nsuni, Nzambi, Emmanuel, Nzambi na beto. “Nzambi vwandaka na

kati ya Klisto, na kuvutulaka yinza na ngwisani na Yandi mosi.” Yandi yayi awa, ke na kutambulaka bisika.

609 Ntangu yayi, Yandi kulumukaka mpe salaka kusantisama, to mutindu, to munkayulu, ti na nzila ya lufwa ya Yandi kupesa munkayulu, kufuta ntalu ya disumu, ti Yandi lenda vutuka mpe kuzinga na kati ya beto. Na yina lukwikilu yina beto me kuzwa kele—kele lukwikilu ya kufuka, to muntu ya kufuka. Na yawu beto ke talaka ve na bima yina beto ke monaka na vwale yayi. Vwale kele bandongosolo, mpe yawu ke salaka bima mpe ke zonzaka bima. Ya kele kima ya science. Kasi Mpeve ya Nzambi yina moyo yina ke zingaka na kati awa, ke bokilaka bima yango yina vwandaka ve, mutindu ti ya vwandaka, kana Nzambi tubaka yawu. Beno tala kufuka ya beno. Beto kele na kati ya vwale.

610 Ntangu yayi, kilumbu Yandi ke vumbula vwale yayi, ve ya kubutama na kento na nzila ya kuvukana ya bakala mpe kento, kasi na nzila ya luzolo ya Nzambi Yandi ke zonza mpe ya ke salama. Kuna beto ke kuzwa nzutu mutindu nzutu ya Yandi Mosi ya nkembo. Beto ke vwanda ya kufuka, na yawu beto lenda zonza mosi na yankaka, kupesana mosi na yankaka mbote.

611 Ntangu yayi, ntangu beto ke katuka awa, ya kele na tabernacle, théophanie, kaka kizizi ya muntu, yina ke kudyaka ve, ke kunwaka ve, ke lalaka ve, ya kuvumbuka kukondwa nsuka. Ya kele kisika beto ke na kwenda. Kasi bawu ke na kuvingilaka na yisi ya Autel, na kubokaka, “Mfumu, tii wapi ntangu? Tii wapi ntangu?” samu na kuvutuka na yisi. Samu ti, bawu zola kupesana mbote mosi na yankaka. Bawu zola kuvwanda na yisi mpe kudyaka, mpe kuzonza mosi na yankaka. Bawu kele bantu. Nkembo na Nkumbu ya Mfumu!

612 Ntangu Nzambi salaka muntu na kizizi ya Yandi Mosi na mbandukulu, Yandi salaka yandi mutindu yina. Yandi ke bundanaka mosi na yankaka, samu ti beto zaba mosi na yankaka. Beto zola bima yina Nzambi salaka beto, samu ti beto kele ya kusala mutindu yina. Na Nkwizulu ya Yandi ya nene, bayina kele ya kuyilama ke vwanda mutindu yina kukondwa nsuka. Bayina ke fwaka ve, beto ke telama mutindu Yandi. Oh nkembo na Nkumbu yina ya Klisto!

613 Mpe ntangu yayi beto kele na kifutu ya mpulusu ya beto, na yina beto ke ndima Yandi mutindu Mvulusi ya beto mosi, mutindu Munyakisi ya beto. Nyonso yayi kele bakufuta, to, bandandu ya mbote yina police ya assurance futaka. Amen. Beno zaba yinki kele police ya assurance. Beno lenda kuzwa bandandu ya mbote na yawu tii ntalu ya mbongo lunga. Kieleka. Beno lenda kuzwa bandandu ya mbote. Mpe beto ke na kuzwa bandandu ya mbote ntangu yayi. Kaka, kima, na ntangu beto ke kuzwa bandandu ya mbote, bakufuta me tungama dyaka.

614 Muntu ya assurance, kilumbu mosi, tubaka na munu, “Billy, mu zola kutekisa nge assurance mosi.”

Mu tubaka, “Mu kele na mosi.” Kento ya munu me baluka na kutala.

615 Ntangu yayi, mu kele na dyambu ve na assurance. Kasi bantu yankaka me kuma “mputu samu na assurance.” Na yawu, bawu balukaka. Yandi tubaka . . .

616 Kento ya munu me tala munu, me yituka, “Nge kele na assurance?”

617 Mu tubaka, “Kieleka.” Yandi zabaka kima ve na yina me tala yawu.

618 Yandi tubaka, “Mbote, Billy, wapi mutindu ya assurance kele na nge?”

619 Mu tubaka:

Kivuvu ya kyese, Yesu kele ya munu!
Oh, wapi luwu ya ntete ya nkembo ya
Kinzambi!
Kibyadi ya mpulusu, Nzambi futaka,
Ya kubutama na Mpeve ya Yandi, ya kusukula
na Menga ya Yandi.

620 Yandi tubaka, “Yina kele mbote mingi, Billy,” yandi tubaka, “kasi ya ke tula nge ve na kati ya maziama awa.”

621 Mu tubaka, “Kasi Yawu ke basisa munu. Yina kele dyambu ya ngundi.” Mu ke na boma ve ya kukota kuna; mu ke na boma na kubasika.

622 Mpe katuka mu me kuzwa assurance, na nzila ya Nzambi ya Seko yina zengaka ndefi, ti Yandi ke vumbula munu dyaka mutindu Mwana ya Yandi, na kilumbu ya nsuka, mu ke tambula na kivuvu mpe mu kele na kubomba mpe kizundu ya moyo, ti, na yina mu kele na kati ya vwale yayi ya kele na Kima mosi yina lenda monana ve yina ke kanga munu na Ditadi ya bansungi kuna. Na yina bamaza ke kwiza mbangu mpe ke bula na ngolo, ya ke sala ata luswaswanu mosi ve. Kana ya kele na lufwa, nsisi, to kima yankaka, ya ke kabula beto ve na zola ya Nzambi. Kizundu ya munu ke kangama na kati ya vwale. Ti kifuluka ya nene ya maza kutelama. Ti Yawu funguka. Ti bantu ya kukondwa kwikama. Mukwikidi yina me butuka mbala ya zole ke na kizundu. Beno lenda mona ntete ve na nzila ya vwale yayi. Kasi mu zaba ti kizundu ya munu kele ya kukangama kuna na Ditadi ya bansungi, Yandi kele nsilulu yina zengaka ndefi ti Yandi ke vumbula munu na kilumbu ya nsuka.

623 Kukondwa ntembe beno lenda tala lufwa na kizizi, mpe kutuba, “Wapi kisika kele ntunga ya nge? Ndyamu, wapi kisika kele kununga ya nge? Kasi matondo na Nzambi Yina ke pesaka beto kununga na nzila ya Mfumu Yesu Klisto.”

Na yina *muntu yina tekilaka* . . .

Oh, la la! Beto ke kota ve na lesu.

Kisika muntu yina tekilaka . . . samu na beto

⁶²⁴ Muntu yina tekilaka. Beno me talaka ntete, na bilumbu ya ntama na wesete (Bambala mingi mu me sabukaka banzila yango ya ntama.), muntu yina vwanda tekilaka, to mukienzudi? Ntangu wagon ya masini vwanda beba, samu na maza, mukienzudi vwanda kima na ntwala. Mpe yandi ke mona bantu ya Inde; yandi ke zunga bawu. Mpe yandi ke mona kisika ya vwandaka na yinto ya maza. Yandi ke vutuka na nswalu nyonso na kutuba na kutuba na mfumu ya wagon ya masini, “Sala bampunda kukwenda mbangu, ti muntu nyonso kuzwa ngolo, samu ti kaka na zulu ya mongo ya kele na yinto ya nene ya maza.” Yandi kele muntu yina ke tekilaka.

⁶²⁵ Mpe awa, Muntu yina ke tekilaka. Muntu kilumbu mosi vwandaka ya kukanga na dyabulu, na yisi ya tiya ya mbangu, kasi Muntu mosi bakaka dizanza ya masini ya kingundu. Ya vwandaka Yesu. Muntu yina ke tekilaka kwendaka na ntwala ya beto. Mpe Satana ya kutelama kuna na masini ya munduki, vwanda kanga beto, ntangu nyonso na bumpika mpe boma ya lufwa. Yandi vwanda keba na Yinto ya maza yango. Kieleka, yandi vwandaka. Ba pesaka yandi kisalu yina, samu ti beto sumukaka mpe ba katulaka beto ntama ya Yawu. Kasi Muntu yina tekilaka, Klisto, me kota mpe me baka dizanza.

⁶²⁶ Beno me kuwaka nkunga yina ya ntama, “Beno keba na forteresse, samu ti Mu ke na kwiza”? Beno keba na forteresse, kima ve; beto baka yawu. Beto zola dyaka ve kukeba na yawu. Klisto me baka forteresse. Alleluia! Mwelo kele ya kufunguka. “Ya kele na Yinto ya maza ya kufunguka na yinzo ya Nzambi, na mbanza ya David, samu na kusukula, samu na kuvedila bansumuki.” Muntu ya beto yina tekilaka kotaka yimeni samu na beto.

⁶²⁷ Muntu yina tekilaka, Yandi ke tuba na beto, “Ya kele kaka na kisika na zulu, kuna, kisika beno ke kuma ata mbala mosi ve kiboba.” Kisika ya ke vwanda ve na mifutu, kisika beno ke vwanda ve na nsatu ya kusadila bima ya Max Factor samu na kutalana mbote na ntwala ya bakala ya beno. Muntu yina tekilaka kwendaka na ntwala. Ya kele ve kisika beno ke nuna mpe ke lemba mpe ke tekita. Ya kele kisika beno ke kuma ata mbala mosi ve ya kubela. Kisika bébé ke kuzwa ata mbala mosi ve mpasi na kivumu. Kisika beno ke zimbisa ata mbala mosi ve ya luvunu, to dinu, samu na kuzwa mosi. Alleluia! Oh Nkumbu ya Yandi kusakumuka! Yandi kotaka, mpe bantu yina ke kufwa ve beto ke telama na mutindu Yandi, kilumbu mosi kuna. Na kusemaka ya kulutila bambwetete mpe mwini. Kieleka. Muntu yina tekilaka me kwenda na ntwala ya beto.

. . . muntu yina tekilaka me kwenda, me samu na beto kotaka, Yesu, kumaka nganga-Nzambi ya ntete tii seko na mutindu ya Melchisédek.

628 Muntu yayi ya nene yina tekilaka kwendaka na ntuala ya beto, na kusalaka nzila. Yandi me kuma katuka Mpeve, bayinto ya maza ya nene ya mukyama ya Nzambi, Yandi yina kuzwaka ata mbandukulu to nsuka ve. Yandi vwandaka, kukondwa nsuka, Nzambi.

Munzenzi yayi ya Nsemo me basika. Ya vwandaka munzenzi ya zola, ya kele yina ya ngundi, ya mbwaki. Ntinta yankaka landaka, ya vwandaka bleu; bleu, kukwikama. Na manima, landaka na manima yina vwandaka bantinta yankaka, na nzila ya bantinta sambwadi ya kulunga, yina kele Bampeve sambwadi ya Nzambi, yina basikaka na Yinto ya maza yango ya nene to na Diamand yango ya nene yina Yesu zonzilaka. Diamand yango ya nene vwandaka ya kuzenga, samu na kulakisa bantinta yayi. Nzambi kumaka nsuni mpe zingaka na kati-kati ya beto, ti Yandi lendaka lakisa bumbote ya Yandi mpe kyadi na kati-kati ya beto, na nzila ya makabu mpe bidimbu mpe mambu ya ngitukulu. Mukyama yango ya muvimba ya nene vwandaka me kuma na Théophanie, ya kusala na kizizi mutindu muntu, kasi, Yandi vwandaka ve muntu, Yandi kuzwaka ntete ve nsuni, Yandi vwandaka Théophanie.

629 Moise tubaka, “Mu zola kutala Nge.” Nzambi bumbaka yandi na ditadi.

630 Mpe ntangu Yandi lutaka, Yandi pesaka Yandi mukongo. Moise tubaka, “Ya ke talana mutindu manima ya muntu.”

631 Na manima yinki kusalamaka? Kilumbu mosi kuna, na yina Abraham vwandaka ya kuvwanda na kati ya tenta. Beto ke kuma na yawu, na nkokila yayi. Na yina Abraham vwandaka ya kuvwanda na kati ya tenta ya yandi, Nzambi me belama na yandi, na nzutu ya nsuni.

“Oh,” beno ke tuba, “Mpangi Branham, yandi vwandaka . . .”

632 Beto ke mona Yandi kaka awa kukutana Abraham ntete yawu, na mutindu ya Melchisédek, nzutu ya nsuni, yina vwandaka Nzambi. Kieleka, ya vwandaka. Yandi vwandaka Nzambi na kati ya nsuni.

633 Beno ke tuba, “Na yina, Mpangi Branham, samu na yinki Yandi zolaka kuvutuka mpe kubutama?”

634 Kuna Yandi kubutamaka ve. Yandi kuvangamaka kaka, na nzutu yina Yandi zingaka na kati. Melchisédek vwandaka Ntinu ya Salem, yina kele Ntinu ya Jérusalem, yina kele Ntinu ya ngemba; yina kuzwaka ve tata to mama, mbandukulu ya bilumbu to nsuka ya luzingu.

Yesu kuzwaka nyonso zole tata mpe mama, mpe mbandukulu ya bilumbu mpe nsuka ya luzingu. Kasi Yandi vwandaka ya kusala “landila mutindu” ya Melchisédek, yina kuzwaka ata mbandukulu ya bilumbu to nsuka ya luzingu.

635 Melchisédek vwandaka Nzambi Yandi mosi. Melchisédek vwandaka Jéhovah Nzambi, Yandi yina mosi kutanaka Abraham, bamvula na ntwala, na ntwala ya tenta ya yandi. Yandi vwandaka na mukongo ya Yandi ya kubaluka na yandi; Yandi tubaka, “Samu na yinki Sara me seka?” Ya kele kieleka. Yandi vwandaka Yandi yina telamaka kuna, vwandaka tala na ntwala ya Sodome. Abraham kubakulaka Yandi, samu ti na kati ya vwale ya yandi vwandaka na kizundu yina vwandaka ya kukangama na nsilulu yango. Ve samu ti yandi kuzwaka sensation mosi, kasi Nzambi salaka yandi nsilulu. Mpe na yina yandi kotaka na kuvukana na aimant ya nene yina, yandi zabaka ti Yawu vwandaka na kati ya nsuni yina.

636 Me basika na Abraham, me tambula kuna fyoti. Yandi tubaka na Abraham. Yandi tubaka, “Na kumonaka yina, Mu ke bumba mambu yayi na Abraham, na kumona yandi kele kibyadi ya yinza? Mu lenda sala kaka yawu ve.” Na yawu, “Abraham, Mu ke tuba na nge yinki Mu ke na kwenda sala na nzila ya Munu,” beto ke baka yawu na nkokila yayi, “kuna na Sodome,” mpe yinki bawu nyonso vwanaka kwenda sala. Mpe na yina Yandi sakumunaka Abraham, Yandi me vutuka na zulu dyaka. Muntu yina telamaka kuna mpe yina vwandaka na putulu na bilele ya Yandi, Muntu. Mpe yina kaka ve, kasi Yandi kudyaka nsuni ya mwana ya ngombe yina Abraham kufwaka, mpe kunwaka miliki ya ngombe ya kento, mpe kudyaka mwa ba-galette ya masangu (mwa dimpa ya masangu), mpe tulaka na zulu ya yawu manteka. Ya kele kieleka mbote. Mpe na manima vutukaka dyaka na Théophanie.

637 Yinki ya vwandaka? Samu na yinki Yandi bakaka yawu ve kuna? Yandi kuzwaka ata mbala mosi ve mbutukulu mutindu beno mpe munu. Kasi Yandi zolaka butama na nsuni, samu ti Yandi kulenda kusimba ntunga yango. Yina vwandaka nzutu ya kuvanga. Yina vwandaka nzutu yina Yandi bendaka na calcium mpe potasse na kubasisaka na ntoto, mpe tubaka, “Fiu,” mpe me kota na kati ya yawu. Yina vwandaka kima mosi yina Melchisédek vwandaka. Yandi kotaka na yawu, na nzutu yina Yandi lendaka na kubelama na ntwala ya yandi na yisi ya vwale, na mvwela ya ngidikulu ya Yandi Mosi; vwale ve ya ngidikulu ya kento, na nzila ya kivumu ya kento, na nzila ya cellule, ata fyoti ve. Kasi Yandi vangaka yayi mpe kotaka na kati ya yawu, mpe zonzaka, na mutindu ya Melchisédek.

638 Nani kele Melchisédek yayi?

Samu ti Melchisédek yayi, ntinu ya Salem, (yina kele Jérusalem), mwana ya ntinu ya bakala ya Nzambi ya zulu mingi, (kieleka), yina kutanaka Abraham na kuvutukaka na bitumba yina yandi nungaka bantinu, mpe sakumunaka yandi;

Na yandi mpe Abraham pesa kikunku ya kumi ya nyonso; na kuvwandaka na ntete landila lutendulu Ntinu ya ludedomo, (zola yango ya nene, Mpeve yango ya nene na mbandukulu) . . . Ntinu ya ludedomo, . . . na manima ya yina . . . Ntinu ya Salem, yina kele, Ntinu ya ngemba;

Yina ke na tata ve, mama ve, dikanda ve, yina ke na mbandukulu ya bilumbu ve, to nsuka ya luzingu ve; . . .

639 Nani ya vwandaka? Yandi ata mbala mosi ve kubutamaka, Yandi ata mbala mosi ve ke kufwa. Nani ya kele? Ya vwandaka Nzambi, kieleka, ya vwandaka, na kinsinsya ya ntete ya Mfumu Yesu. Kieleka ya vwandaka. Kasi Yandi zolaka kwiza na nzila ya kento, na mutindu beno me kwiza na nzila ya kento. Mpe Yandi zolaka kwiza mutindu beno me kwiza, samu na kuvutula beno na Yandi. Alleluia!

Lemvo ya ngitukulu! Wapi mutindu mbote ya ke wakana,
Yina vuukisaka muntu mutindu munu ya mputu, ya mpofo ya mawa!
Mbala mosi mu vwandaka ya kuzimbana, kasi awa mu me talana, na lemvo ya Yandi,
Mu vwandaka mpofo, kasi ntangu yayi mu ke mona.

640 Mu me bakula yina Yandi zolaka sala. Nzambi kumaka munu, ti munu na nzila ya lemvo kukuma ya Yandi. Yandi bakaka masumu ya munu, ti na nzila ya ludedomo ya Yandi mu kuzwa Luzingu ya Kukonda nsuka. Mu zolaka sala nsodolo ve munu mosi. Mu vwandaka na nkadulu ya musumuki. Mu vwandaka ve na kima ya kusala na yawu. Mu vwandaka “ya kubutama na yinza, ya kusala na kati ya disumu ya nko, kwizaka na yinza na kuzonzaka baluvunu.” Ata siansi mpe ve, ata fyoti; kima mosi ve, ata nsatu mpe ve.

641 Beno tuba na ngulu ti yandi kele “na foti, na kudya pátée,” beno lenda? Beno mona wapi mutindu yandi ke kuwa beno. Beno tuba na nkwanwa ti yandi kele “na foti, na kudyaka na bamvumbi ya baniama ya kufwa,” mpe beno mona yinki yandi ke tuba na beno. Kana yandi lendaka zonza, “Kipe mambu ya nge.” Kieleka.

642 Oh, kasi lemvo ya Nzambi ti me sobisa nkadulu yayi, mpe me pesa munu bweso ya kuzwa nsatu mpe nsatu ya nene mpe mpwila, “Bumbote ya Nge kele mbote samu na munu kulutila luzingu, O Nzambi. Ntima ya munu ke zola mingi Nge.”

643 David tubaka, “Mutindu mbambi ke vumuna samu na yinto, mutindu mosi moyo ya munu ke na kufwa na nsatu ya maza na manima ya Nge, O Nzambi.”

644 Nzambi pesaka muntu mpwila yina, samu na kusambila Yandi, samu na kuzola, samu na kusosa Yandi. Kasi muntu

balulaka yawu na lubokilu ya dyabulu, mpe yandi ke kwenda mpe ke lula bakento mpe biese mpe bima ya yinza, na kumekaka na kusepelisa kivangu yina ya santu yina Nzambi tulaka na kati, ya kuzola Yandi. Yandi ke tula yawu na zulu ya bima ya yinza. Kasi, mpangi, ntangu mbala mosi yandi me soba, mpe na bitutu na kati ya yawu, ndonga ya nene na mutindu nyonso ya—ya muvusu, me sukulama nyonso mpe ba me kufwa nyonso, mpe ti Maza ya kuvedila ya Nzambi me tulama na kati kuna, disumu lenda ata mbala mosi ve kusimba yawu. Amen.

O mutindu mu zola Yandi! Mutindu mu ke kembila Yandi!

Luzingu ya munu, Mwini ya munu, nyonso na nyonso ya munu!

Kiyidiki ya nene me kuma Mvulusi ya munu, Mpe kufuluka nyonso ya Nzambi ke zinga na kati ya Yandi.

Me kulumuka na nkembo ya Yandi, disolo ya kuyituka,

Nzambi mpe Mvulusi ya munu me kwiza, mpe Yesu vwandaka Nkumbu ya Yandi.

Ya kubutama na kidikilu, nzenza samu na baya Yandi Mosi,

Nzambi ya kiadi, ya masa ya meso mpe ya mpasi mingi.

O mutindu mu zola Yandi! Mutindu mu ke kembila Yandi!

Kupema ya munu, Mwini ya munu, nyonso na nyonso ya munu!

⁶⁴⁵ O Nzambi! Wapi mutindu Yandi zolaka sala yawu? Muntu mekaka na kusonika yawu. Muntu tubaka:

Kana beto na mubu ya kufuluka na tinta,

Mpe ti konso nyanga na ntoto disala;

Mazulu nyonso buku,

Mpe ti konso muntu musoniki;

Kusonika zola ya Nzambi

Mutindu Nzambi ya nene yango ya Mazulu kumaka nsuni mpe bakaka masumu ya munu!

Kusonika zola ya Nzambi

Ke yumisa mubu;

To ata buku ke lunga nyonso ve,

Ata yinda ya zulu na zulu.

⁶⁴⁶ Mpe samu na kusala bibyadi ya mpulusu yayi kivuvu ya kieleka, Yandi zengaka ndefi na Yandi mosi ti Yandi ke vumbula beto na bilumbu ya nsuka, ke pesa beto Luzingu ya Kukonda nsuka. “Mpe muntu ve lenda botula bawu na diboko ya Munu.” Amen.

Beto sambila.

⁶⁴⁷ Beno me zaba ti beno vutulaka na manima zola ya Yandi? Beno kimaka Moyo ya Yandi ya kusakumuna, Yandi ya nene yayi yina salaka beno yina beno kele? Mpe ntangu yayi awa beno kele, na suka yayi, ntama na luzingu, mpe bweso me pesama na beno. Beno zola kulandila kuzinga? Ya kele kaka na mutindu mosi ya kuzinga, ya kele kukwikila na Mfumu Yesu. Kana beno, na ntima ya beno, ke kwikila ti Yandi kele Mwana ya Nzambi mpe me ndima Yandi mutindu Mvulusi ya beno, mpe kukwikila ti Nzambi vumbulaka Yandi samu na lunungu ya beno, kana beno zola kundima yawu na zulu ya lufulu yina, ya kele ya beno ntangu yayi.

⁶⁴⁸ Beno zola kutelemisa diboko ya beno? Moyo mosi yina zola ve kufungula masumu, ti ke zola kufungula masumu na nsuka yayi, kutuba, “Bambuka moyo na munu, mpangi, mulongi, na yina beto ke kota na kisambu. Munu mpe kele ya kubwa. Mu kumaka ya dibuundu, kasi mu—mu zaba ti mu—mu me kuzwaka ntete ve yina nge ke na kuzonzila. Mu me butamaka ntete ve na Mpeve yina, Mpangi Branham. Mu—mu me kuzwa Yawu ntete ve, kaka yina. Mu zola nge sambila samu na munu, ti Nzambi ke pesa Yawu na munu na suka yayi.” Nzambi sakumuna nge, tata. Ya kele na yankaka? Beno tuba, “Nzambi, sala munu yina Nge zola munu kuvwanda. Mu zola Nge kuvwanda. . . Mu zola kuvwanda mutindu Nge zola munu kuvwanda. Mu me vutula manima zola ya Nge.” Nzambi sakumuna nge, mwana ya bakala.

⁶⁴⁹ Kaka ntangu fyoti ntangu yayi.

Kana beto na mubu ya kifuluka na tinta,
Mpe ti zulu buku;
Ti konso mwinga na ntoto disala,
Mpe ti konso muntu musoniki;
Kusonika zola ya Nzambi
Ke yumisa mubu;
To buku ke lunga nyonso ve,
Ata yinda ya zulu na zulu.

Oh, zola ya Nzambi, mutindu bimvwama mpe
ya kuvedila!
Ya kukondwa lubakusu mpe ngolo!
Yawu ke vwanda ntangu nyonso,
Nkungu ya basantu mpe Bawanzio.

⁶⁵⁰ Nzambi ya luzolo, kieleka musoniki yina sonikaka bampova yango vwandaka kaka mutindu mingi ya bayankaka ya mikwikidi ya Nge, na kusosaka, na kumekaka na kuzwa bampova ya kutuba yawu. Mpe ya kele ya kusonika na Biblia, “Ya kulutula, samu ti mulongi vwandaka na ndwenga, yandi monaka mpe sungikaka bampova mingi.” Oh, mutindu beto ke zola kuzwa ndinga mpe mpova yina beto lendaka bangula na bantu yinki kieleka ya kele, kasi ba lenda kuzwa yawu ve na

bikoba yina ke kufwa. Mu ke sala ntembe, ti Seko nyonso ke lenda na kumonikisa yawu, mutindu ti Nzambi ya Mazulu me kwiza na ntoto samu na kuvuukisa misumuki ya mputu, ya kuzimbana ya mawa.

651 Mu ke sambila Nge, Tata, ti na nzila ya mwa bampova yayi ya kuzengana ve, to bampova ya kuzengana na suka yayi, mutindu mu ke tuba, ti muntu mosi me kuzwa ngemba mpe kyese mpe kubomba ya ngolo, yandi yina me kima na kiswamunu. Mpe ti moyo ya bawu kukangama na nsilulu yina Nzambi zengaka ndefi, ti Yandi ke vumbula bawu na kilumbu ya nsuka. Maboko mingi vwandaka me telama, na kati ya kivinga, kaka awa na kati ya tabernacle yayi. Nzambi, pesa bawu kivuvu yango ya ngolo, kaka ntangu yayi. Ti bawu kangama na Ditadi ya bansungi. Ata mutindu yimbi mubu ke ningisa mpe ti mwa babwatu ya bawu kudumuka, bawu kele na kizundu, nsilulu ya Nzambi. Kuna bawu ke vwanda, “Nzambi tubaka Yawu. Yandi lenda vuna ve.”

652 “Yandi yina ke kuwa Bandinga ya Munu,” yina mu me longa na suka yayi, “mpe ke kwikila na Yandi yina fidisaka Munu, Jéhovah, kele na Luzingu ya kukondwa nsuka; mpe ke kwiza ve na lufundusu, kasi me luta lufwa na Luzingu.”

653 O Yandi ya Seko, sakumuna bayayi bubu yayi. Mpe ti muntu nyonso na kati awa yina kele na yisi ya Menga, yina moyo ya bawu me ndima ata mbala mosi ve, ti ya salama kaka ntangu yayi, Mfumu. Nge sala dinsweki. Ya kele nyonso ya Nge. Ya me pesama na Nge. Mu ke sambila ti Nge ke pesa yawu na bawu, Luzingu ya Kukonda nsuka. Ti, kilumbu, na lweka yankaka ya simu, na yina mosi na mosi beto ke sabuka kiwanda, ti beto kukutana kuna kisika bawu ke tuba ata mbala mosi ve “ye-ye-ye” dyaka.

Kilumbu beto ke kwiza na nzadi na nsuka ya
ntangu,
Ntangu mabanza ya nsuka ya mpasi ke luta;
Ya ke vwanda na Muntu ke vingila yina ke
lakisa beto nzila,
Mu ke sabuka Jourdain munu mosi ve.

Ya ke vwanda na Muntu, Muntu ke vingila
samu na kulakisa munu nzila,
Mu ke sabuka ve Jourdain . . .

654 Beno nyonso yina kele na kivuvu yina, beno telemisa diboko ya beno ntangu yayi na yina beno ke nangula yintu ya beto.

Mu ke ve . . .

Ntangu yayi beno sambila kaka Yandi. Nsangu me manisa. Beno kele na nsayi ve? Nzambi zengaka ndefi ti Yandi ke zola ve . . . Nzambi zengaka ndefi ti Yandi ke kutana beno kuna.

Yesu fwaka samu na masumu na munu nionso;
 Ntangu mpimpa mu... (Yinki beno ke tuba?
 Ntungame suka.) Yandi ke vingila munu,
 Mu ke sabuka Jourdain munu mosi ve.

Bantangu yankaka mu ke yambula, mpe ya
 kulemba...

Beno yimbila kaka Yandi ntangu yayi.

... mutindu ti bankundi ya munu nyonso me
 kwenda;

Beno me kuma ntete na kisika yina?

Kasi ya kele na dibanza mosi yina ke
 pesa munu ngolo... (Yinki vwandaka
 nsilulu?) ... yina ke sepelisa ntima ya munu,
 Mu ke sabuka ve Jourdain...

⁶⁵⁵ Ntangu yayi, bana ya nsilulu, beno sambila kaka Yandi na
 kusalaka yawu.

Mu ke sabuka Jourdain munu mosi ve,
 Yesu fwaka samu na masumu na munu nionso;

Yinki ke salama ntangu yayi?

Ntangu mpimpa mu ke mona, Yandi ke vwanda
 na kuvingila munu,
 Mu ke sabuka Jourdain munu mosi ve.

Ntangu mu ke kwiza na nzadi...

Mosi na mosi ya beno ke na kwiza. Ya kele na kinsinya
 ya nene, ya ndombi ya kuvwanda kuna na ntwala ya beno. Ya
 kele mwelo ya nene. Beno ke kota kuna, mosi ya bilumbu yayi,
 ya lenda vwanda ntete kilumbu suka, ya lenda vwanda ntete
 dibuundu kanga na suka yayi. Beno ke kota kuna. Konso ntangu
 ti ntima ke bula, beno ke belama kitambi mosi.

Kasi ntangu mpimpa mu ke mona, Yandi ke
 vwanda na kuvingila kuna,

Yandi tubaka ti Yandi ke vwanda. Yandi zengaka ndefi ti
 Yandi ke vwanda.

Na yina mu ke sabuka Jourdain munu mosi ve.

⁶⁵⁶ O Nzambi ya kusakumuna, bantima ya beto me fuluka, na
 suka yayi, me fuluka mingi.

⁶⁵⁷ Na kubanza na ntangu kubula ya ntima ke suka, mpe ti
 infirmière ke yidika kuse pene ya yintu ya beno. Mpe maboko
 ya beno, beno lenda dyaka ve kuningana. Maboko ya beno me
 kituka ngalasi. Bana ya beno, mama ya beno, baya beno ya
 luzolo ke na kuboka mpe ke na kudila. Mwelo yango ya nene ke
 funguka, kuna. Yandi ke vwanda na kuvingila.

⁶⁵⁸ David tubaka, “Kana mu lala na difelo, Yandi ke vwanda
 kuna.” Mu ke sabuka yawu ve munu mosi. Ntangu mabete ya

nzadi ke banda na kuzwa na kizizi ya beto, Nzambi ke baka bateau ya sauvetage, ke twadisa beto kaka tii lweka yankaka. Yandi silaka ti Yandi ke vwanda. David profete tubaka, “Yinga, kana mu tambula na kiwanda ya kinsinsya ya lufwa, mu ke tala boma ya dyabulu ve. Nge kele na munu. Houlette ya Nge mpe yinti ya Nge, ke pesa munu ngolo.”

⁶⁵⁹ Mfumu, beto kele na kyese mingi bubu yayi, ti beto vwandaka ya kubwela bibyadi ya nsilulu. Bubu yayi beto kele na kati ya beto Luzingu ya Kukonda nsuka, samu ti beto zola Mfumu Yesu mpe me kwikila Yandi, mpe me ndima Ndinga ya Yandi mpe malongi ya Yandi. Mpe Yandi me pesa na beto, mutindu kidimbu ya lukwikilu ya beto, Mpeve-Santu, kidimbu ya Mpeve-Santu. Lukwikilu ya beto na kati ya beto kele ya kukangama. Mpe ata ti bambala mingi beto ke na kutambula na binsinsya ya mpimpa, bambala mingi beto ke na kubwa nzila nyonso, kasi kizundu ya beto ke simba dyaka mbote. Ya kele na kima na kati ya yawu, kuna, yina ke landila na kutwadisa beto, na kutubaka, “Kwenda na ntwala. Beto ke landila na kukwenda na ntwala.”

⁶⁶⁰ Nzambi, sakumuna beto. Beto ke na nsatu ya Nge. Bumba beto ya kukwikama mpe ya kieleka tii ntangu Nge ke kwiza samu na beto, beto ke kembila Nge tii bansungi ya seko. Mpe kilumbu yina ntangu beto ke telama na zulu ya ntoto. . . Makulu ya Yandi ya kusakumuna me simba ntete ve ntoto. Na yina Yandi ke telama kuna, na zulu; mpe ti basantu mpe bayina ya kuvulusa na bansungi nyonso, ya konso kukyelola, ya ntete, ya zole, ya tatu, ya yiya, ya tanu, ya sambanu, mpe ya sambwadi, bawu nyonso ya kutelama kuna ya kulwata ludedomo ya Yandi; beto ke byadisa Yandi Ntinu ya ntinu mpe Mfumu ya bamfumu, mpe kuyimba masolo yango ya mpulusu. Bantima ya beto ya mawa ke yituka na yina beto ke tala na Yandi yina zolaka beto mpe pesaka Yandi mosi samu na beto. Na yina beto kele yina ba lenda zola ve mpe misumuki, Klisto kufwaka ti beto kuzwa mpulusu. Beto ke tonda Nge samu na yawu, Tata, na Nkumbu ya Klisto. Amen.

⁶⁶¹ Beno zola Yandi? Oh, mutindu kieleka Yandi kele. Beno ke na kuwa kaka ve mutindu ti beno ke zola kaka na mutindu mosi kutula maboko ya beno na ziunga ya Yandi? Beno ke zola kaka ve kukomvula mpe kusimba makulu ya Yandi, beno zaba?

⁶⁶² Beno zaba, ya vwanda vwanda na bantu mosi yina vwanda kwizaka na balukutakanu ya munu na Phoenix, na Arizona, ke tuba, “Mu ke zola kuzonza dyaka yawu na Yandi. Mu ke zola kutuba, ‘Mfumu, Nge zolaka munu ntangu nzila ya munu vwandaka kuma mpimpa mingi.’” Mu ke zola kaka kuzonza dyaka yawu na Yandi ntete beto sabuka. Mu—mu zola kumona Yandi. Mu—mu—mu zola kaka kumona Yandi. Kubanza mutindu mu ke kuwa, mutindu ntima ya munu ya mawa ke yituka ntangu mu ke mona Yandi kutelama kuna.

663 Mu vwanda kumiyufulaka, “Mu ke zola mu kuwa Ndinga yango kutuba, ‘Beno kwiza na Munu, beno nyonso yina kele ya kulemba mpe ya kizitu ya nene. Mu ke pesa beno kupema.’”

664 Kukondwa ntembe mu ke kuwa yawu ata mbala mosi ve mpova na mpova mutindu Yandi zonzaka yawu kuna, kasi mu zola kuwa Yandi kutuba, “Yayi kele kilumbu ya nsuka. Ya vwandaka mbote, kisadi ya Munu ya mbote mpe ya kukwikama, ntangu yayi kota na bakyese ya Mfumu yina ba kubikaka samu na nge.” Katuka wapi ntangu?

665 “Katuka yina nge me vuuka?” Ve mpangi.

666 “Katuka mbandukulu ya yinza, ntangu Mu monaka nge mpe zabaka nge ntete, mpe solaka nge samu na Luzingu ya Kukonda nsuka,” kuna beno kuzwaka lusakumunu. “Bayina nyonso Yandi zabaka ntete, Yandi me bokila bawu.” Ya kele kieleka? “Bayina nyonso Yandi me bokila, Yandi me nungisa. Bayina Yandi me nungisa, Yandi me pesa nkembo yimeni.” Beno bawu yayi. Yandi zabaka beto ntete, bokilaka beto, nungisaka beto, mpe ba me pesa beto yimeni nkembo na Yandi, na nsuka ya yinza, na kukwendaka na musendo ya beto. Beno kele na kyese ve? Kieleka, ya ke sala beno kuzola Yandi. Ntangu beno lenda sadisa beno mosi ve, mpe awa Yandi me kwiza mpe me sala yawu samu na beno.

667 *Nkembo na Basinga Yango*, Mpangi ya kento Gertie. “Bantima ya beto na zola ya Buklisto,” na yina beto ke kuzwa mwa kubundana yayi ya kusambila awa ntangu yayi, na manima beto ke sambila samu na bambevo. Nzambi sakumuna beno. Beno bayina vwandaka me telemisa maboko na Klisto na suka yayi, beno kuzwa kisika ya kusambila, ya kusadila Yandi.

668 Ntangu yayi, beto sambila kaka Yandi ntangu yayi, mutindu dibuundu, beno nyonso ba-Méthodiste, dibuundu ya Nzambi, Ba-Assemblée de Dieu, ba-Presbytérien, ba-Luthérien, bantu ya Katolika. Beto nyonso kintwadi ntangu yayi, beto yimba ntangu yayi.

Nsinga ya ngwisani kusakumuka
Bantima ya beto na zola ya Buklisto;
Kubundana ya dibanza ya dibuta
Mutindu yina ya Zulu.

Na ntwala ya kiti ya kinfumu ya Tata ya beto,
Beto ke tsyamuna kisambu ya beto ya ngolo;
Baboma ya beto, kivuvu ya beto, balukanu ya
beto, kele mosi,
Ngolo ya beto mpe kukeba ya beto.

Ntangu beto me tulama na bitini,
Ya ke pesa beto mpasi na ntima;

Kasi beto ke vwanda dyaka ya kuvukana . . .
(Ba-Méthodiste yikwa, ba-Baptiste, mpe
nyonso?)

Mpe na kivuvu ti beto ke monana dyaka.

⁶⁶⁹ Yina ke sala beno mbote ve? Beto baluka mpe kupesana mosi na yankaka diboko ntangu yayi, na yina beto ke yimba dyaka yawu.

Na ntwala . . .

Beno pesana maboko, na muntu na manima ya beno, na ntwala ya beno, to bisika nyonso.

. . . kiti ya kimfumu,
Beto ke tsyamuna kisambu ya beto ya ngolo;
Bangolo ya beto mpe kukeba ya beto.

Ntangu yayi ntangu beto me tulama na bitini,

Beto ke zola mosi na yankaka.

Ya ke pesaka . . .

Mu zola lukutakanu kulandila? Beno me mona? Ya kele mutindu beto ke banza.

. . . mpasi na ntima;
Kasi beto ke vwanda dyaka ya kuvukana na
kati ya ntima (na mosi),
Mpe na kivuvu ti beto ke monana diaka.

Kana dyaka ve awa, na Kilumbu yango ya nene beto ke kutana.

⁶⁷⁰ Ntangu yayi, Tata, kuzwa kusambila ya beto na suka yayi. Baka Ndinga mpe kunda Yawu na kati ya bantima ya mikwikidi. Ti bawu vwanda kaka ve kidi-kidi, mpe bubu yayi na zulu mpe wanzio na yisi, kasi ti Bandinga yayi kuzwa kisika ya yawu ya kupema na kati ya ntima ya mukwikidi. Na kuzaba yayi, ti, “Nzambi me zenga ndefi na ndefi, mpe ya kele na bima zole ya kukondwa nsobolo. Kukondwa nsobolo ya Nzambi, ya kele, ti ya lenda salama ve samu na Yandi na kuvuna, ti bibyadi ya mpulusu yayi lenda kuzwa kivuvu ya ngolo yayi, ya ngolo mpe ya kieleka, kizundu na moyo.” Na kuzaba yayi, ti, “Nzambi me sila beto, na kuzengaka ndefi. Na lweka mosi, ti Yandi lenda vuna ve; na lweka yankaka, Yandi zengaka ndefi na ndefi na zulu ya yawu, ti Yandi ke vumbula beto na kilumbu ya nsuka mpe ke pesa beto Luzingu ya Kukonda nsuka.” Na kuzabaka, ti, “Na manima ba me bokila beto, ti Yandi tubaka ti Yandi zabaka beto ntete mbandukulu ya yinza, mpe solaka beto na kuzangula ya bana na nzila ya Yesu Klisto. Mpe Yandi zabaka beto ntete. Yandi bokilaka beto. Mpe na yina Yandi bokilaka beto, Yandi nungisaka beto.” Beto lenda kuminungisa beto mosi ve, na yawu Yandi nungisaka beto na lufwa ya Mwana ya Yandi Mosi. “Bayina Yandi me nungisa, Yandi me pesa nkembo yimeni.” Ndinga me zonzama yimeni. Mpe beto kele kaka na

nzila ya beto, ke na kulandila, na kukembilaka na nzila ya beto na Nkembo.

671 Pesa bantu lukwikilu, mpe ti mwa bankadulu mpe bima yina me kangama na bantu, ti bawu katukila yawu, na suka yayi, na Ndinga yayi ya Nzambi yina kele kizundu ya moyo, ngolo mpe kieleka. Ti bawu katukila bankadulu ya bawu, mwa bakudasuka ya bawu. Mpe bima yina vwandaka. . . Mutindu Paul tubaka, na kitini na ntwala ya nsangu na bilumbu fyoti, “Ti beto losa konso kizitu, mpe disumu yina ke simbaka beto kukondwa mpasi, ti beto kima na kukangaka ntima mbangu yina kele ya kutula na ntwala ya beto; na kutalaka na mfumu mpe mumanisi ya lukwikilu ya beto, Yesu Klisto, Yandi yina ba tontaka na mutindu nyonso mutindu beto kele, kasi kondwaka kusumuka.” Ya pesamaka muswa ti ba tonta Yandi, kasi Yandi pesaka ve muswa na mpukumunu. Mpe beto kele ya kutonta na kusumuka, kasi ata mbala mosi ve na kupesa muswa. Samu ti Luzingu yina kele na kati ya beto kele kizundu ya nsuka ya beto ya Seko, mpe beto ke tala yawu ya santu na ntima ya beto.

672 Ntangu yayi, ya kele na mingi yina Satana me talisa mpasi na bampasi. Beto ke na kukubama samu na kusambila samu na bawu, Tata. Ti bawu, na yina bawu ke luta na yisi ya Ndinga ya Nzambi bubu yayi. . . Ndinga ya ntalu yina me longama, Biblia me pesa kimbangi, Bawanzio ya Nzambi me telama pene-pene, mpe Mpeve-Santu ya nene, na zulu ya nyonso, me telama awa samu na kupesa kimbangi na Ndinga. Ntangu yayi, Tata, na yina bawu ke luta na yisi ya Ndinga ya nsilulu, na suka yayi, ti bawu katuka awa ya kubeluka. Kukatula ba-appareil orthopédique ya bawu, kubika ba-fauteuil mpe—mpe bambeto yina bawu me ladila, mpe kuvwanda kaka ya kubeluka. Pesa yawu, Mfumu. Ti bawu vutuka na lukutakanu yina ke landa yina bawu ke kuzwa muswa ya kukwiza, to na mabuundu ya bawu mosi, na kusepelaka, na kulakisaka yina bima ya nene Klisto me sala. Beto ke sala ministère yayi samu na nkembo ya Nge, na Nkumbu ya Yesu. Amen.

673 Mu ke lomba lemvo samu na nsilulu mu salaka, ti na suka yayi beto ke tala kapu ya 7, kasi mu me kuma na yawu ve. Mpe beto fwana pesa mwa ntangu awa samu—samu na yayi, samu na ndonga ya kisambu. Mpe awa, na nkokila yayi, kana Mfumu zola, beto ke baka kapu ya 7, mpe kutala Nani Melchisédek yayi vwandaka. Bantu yikwa ke zola kuzaba? Oh, beto ke zonzila kaka mbala mosi na Yandi, kutala kaka Nani kieleka Yandi kele. Mpe Masonuku ke tuba Nani Yandi kele. Beno me mona?

674 Mpe Scofield ke tuba ti ya vwandaka “kinganga-Nzambi.” Wapi mutindu ya lenda vwanda kinganga-Nzambi, kukondwa mbandukulu to nsuka? Beno me mona, ya vwandaka ve kinganga-Nzambi. Ya vwandaka Muntu, Melchisédek (Nkumbu), Muntu.

675 Ya kele mutindu, na buzitu nyonso, kasi Science Chrétienne ke tuba ti Mpeve-Santu kele “dibanza.” Mpe Biblia ke tuba, “Yandi, Mpeve-Santu.” Mpe *Yandi* kele kiyingilu ya muntu. Ya kele Muntu; dibanza ve. Ya kele Muntu. Kieleka.

676 Mpe Melchisédek kele Muntu, Muntu Yina kuzwaka ata mbandukulu ya bilumbu ve to nsuka ya bamvula. Yandi kuzwaka ata tata to mama, to dikanda. Mpe beto ke tala Nani Yandi kele, kana Mfumu zola, na nkokila yayi, na nzila ya Ndinga. Beno zola Yawu? Oh! “Ndinga ya Nge kele mwinda na nzila ya munu mpe na makulu ya munu.” Oh!

677 Ntangu yayi, beno ke tuba, “Mpangi Branham, mu ke na kubakula Yawu nyonso ve.” Munu mpe.

678 Kasi, kilumbu mosi, mu vwanda longi na Kentucky. Mpe na mwa bantu ya malu-malu, mpe ya Katolika mpe bantu ya mutindu na mutindu, bayina lenda bakula ve mutindu kati mingi, kele bima ya ntalu yayi ya Masonuku. Mu vwanda longi na kubeluka ya Kinzambi. Mwana mosi ya kento ya makulu mwasi nataka. . . Yandi vwandaka ve na bamvula kumi na tanu, yandi vwandaka na mwa bébé, mpe yandi vwandaka na paralysie agitante. Mu tubaka, “Wapi dyambu, mpangi ya kento, kele na bébé ya nge?”

679 Yandi tubaka, “Yandi kele na kutekita.” Yandi zabaka ve mutindu ya kutuba, paralysie agitante. Yandi zabaka ve mutindu ya kubokila yawu.

680 Mwa kima yango na kutala ata mbala mosi ve me lwataka basapatu, na luzingu ya yandi. Cherie ya bakala mosi, bansuki yinda vwanda kubwa. Mu tubaka, “Nge ke kwikila?”

681 Mpe mwa meso yango, ya gris ya kisengo talaka munu. Yandi tubaka, “Yinga, tata. Kieleka mu ke kwikila.”

682 Mu bakala mwa bébé yango. Mpe na yina mu vwanda sambila samu na yandi, yandi bikaka na kutekita. Uh-huh. Mpe ya basikaka, kwendaka na ngaanda.

683 Kilumbu yina vwandaka landa, mu vwanda zomba mpadi, kuna na lweka ya mongo. Mu kuwaka babakala mosi ya kuvwanda kuna vwanda zonza, beto vwanda kuwa makelele ya scie. Mu me belama na malembe. Mu vwanda zomba mpadi. Bawu vwanda zonzila na munu, ya kuvwanda kuna, na kutafunaka tabaka mpe kulobolaka, makasa vwanda ningana, mutindu *yayi*. Mpe bawu vwanda zonzila, awa, na yina me tala lukutakanu ya nkokila na ntwala. Mosi ya bawu tubaka, “Mu monaka bébé yango. Mu lutaka kuna, na suka yayi. Yandi ke na kutekitaka dyaka ve, na suka yayi.” Beno me mona? Yandi tubaka, “Ya vwandaka kieleka.” Mpe yandi vwandaka lobola.

684 Mpe bawu vwandaka na minduki ya kutelama na yinti, na yawu mu banzaka ti mu ke sala mbote na kusala munu mosi

kuzabana. Beno zaba, bawu kele na bamvita ya makanda kuna, mpe. Na yawu, mu belamaka. Mu tubaka, “Mbote, bankundi.”

⁶⁸⁵ Muntu yango ya nene mingi, na kumona vwanda zonza, yandi vwandaka na kitini ya tabaka na kati ya yinwa, mutindu *yina*, na lweka mutindu *yina*, mpe laka ya nene, ya yinda. Mpe yandi vwandaka ya kulwata yimpu ya nene mingi ya ntama, yina vwanda kubwa na ntwala ya kizizi ya yandi. Yandi talaka na nziunga mpe monaka munu. Yandi me baka mpe me kuzwa yimpu yango, me katula yawu, me sala *kolope*, me mina kitini yango ya tabaka, me tuba, “Mbote, pasteur.” Beno me mona? Yinga, tata. Buzitu. Mpe ya kele kieleka. Wapi mutindu yandi me vuukana yawu, mu zaba ve, kasi yandi me vuuka.

⁶⁸⁶ Na yawu, nkokila yina vwandaka landa, na vutukaka, ya vwandaka na muntu mosi kuna yina vwanda zola kuswana na munu mwa fyoti. Yandi vwanda kwendaka na dibuundu yina ke kwikilaka ve na kubeluka ya Kinzambi. Na yawu, yayi vwandaka dibuundu ya ba-Méthodiste, White Hill, na Kentucky. Na yawu yandi—yandi kwendaka na... Yandi vwandaka ya kutelama na ngaanda. Yandi vwandaka na mwinda na diboko ya yandi. Mpe yandi tubaka, “Mu zola kutuba kima, mulongi. Mu lenda kaka ve kundima Yawu, samu ti mu ke na kumona Yawu ve.”

⁶⁸⁷ Mu tubaka, “Nge ke mona Yawu ve?”

⁶⁸⁸ Yandi tubaka, “Ve.” Yandi tubaka, “Munu mosi, kele mbevo. Kasi,” me tuba, “Mu ke na kumona Yawu ve.”

Mu tubaka, “Wapi kisika nge ke vwandaka?”

Yandi tubaka, “Kuna na lweka yankaka ya Big Renox.”

Mu tubaka, “Mbote, wapi mutindu nge ke kwenda na yinzo?”

Yandi tubaka, “Mbote, mu ke tambula na kukwenda na yinzo.”

Mu tubaka, “Nge lenda mona yinzo ya nge?”

Yandi tubaka, “Ve, tata.”

Mu tubaka, “Mpimpa kele mingi na nkokila yayi, ya kele na matuti mingi.”

Yandi tubaka, “Yinga.”

Mu tubaka, “Wapi mutindu beno ke kwenda na yinzo?”

Yandi tubaka, “Na mwinda yayi.”

Mu tubaka, “Mwini ke lakisa ve nsemo nzila nyonso tii na yinzo ya beno.” Mu tubaka, “Wapi mutindu beno ke kwenda?”

Yandi tubaka, “Oh, mu ke tambula na nzila ya mwinda.”

⁶⁸⁹ Mu tubaka, “Yawu yina. Nge kele na nsemo ya mwinda ntangu yayi, mpe konso ntangu nge ke tambula nzila *yayi*, nsemo

ke landila na kulakisa na ntwala ya nge. Kana nge landila kaka na kutambula, nsemo ke landila na kukwenda na nge.”

⁶⁹⁰ Mpe beno ke sala yawu na suka yayi, beno zola Klisto, Nganga-Nzambi ya Ntete ya nene, Musambidi ya kimbevo ya beno, to ya kubela ya beno, to ya moyo ya beno. Beno lenda to ve kubakula Yawu. Beto lenda ve. Kasi beto me kuzwa musiku ya “Kutambula na kati ya Nsemo mutindu Yandi kele na kati ya Nsemo.” Beno sala dikulu mosi na kati ya Nsemo. Mpe na yina beno ke kuzwa Nsemo na beno, Nsemo ke kyenzula tii kilumbu ya kulunga. Ya ke lakisa nzila na ntwala ya beno.

Mpe beto ke tambula nzila yayi ya ntama ya nene,
Na kutubaka bisika nyonso mu ke kwenda,
Mu zola kuvwanda Muklisto ya mutindu ya ntama, Mfumu,
Kuluta nyonso mu zaba.

Beno me kuwaka ntete nkunga ya ntama yango?

Ya kele ve na kima mutindu Muklisto ya mutindu ya ntama,
Ke lakisa zola ya Muklisto;
Beto ke na kutambula na nzila yango ya nene ya ntama,
Mpe kutubaka bisika nyonso beto ke kwenda,
Mu zola kuvwanda Muklisto ya mutindu ya ntama, Mfumu,
Kuluta nyonso mu zaba.

⁶⁹¹ Mu zola kaka yawu. Mbote mingi. Ntangu yayi beto ke sambila samu na bambevo. Beto kele ve . . . Beto ke tuba ve ti beto lenda belusa bambevo. Kana beno sala, beto ke vwanda na kutuba kima ya yimbi. Muntu nyonso ya kubela na kati awa kele yimeni ya kubeluka. Ya kele yina Masonuku me tuba. “Na bamputa ya Yandi beto me beluka.” Ya kele kieleka?

⁶⁹² Konso musumuki yina kele na kati awa, kana ya kele na mosi, beno kuzwaka mpulusu ntangu Yesu kufwaka. Kasi beno kufwa ve awa kisika bweso ya beno me tulama na ntwala ya beno, na kukota na Mvwandulu ya Yandi mpe kumeka na kundima Yawu. Ya kele ya kusala samu na ntangu yayi. Kaka ntangu yayi beno fwana ndima Yawu. Kana beno kwenda ntama ya Menga, kuna beno kele kima ve kasi . . . Beno kele yimeni ya kufundisa, samu ti beno kele ya kufundisa na mutindu ti beno me sala na Kukatulamasumu ya Mfumu Yesu Klisto. Beno me mona? Beno kele . . . beno ke fundisa beno mosi kuna.

⁶⁹³ “Na yawu Yandi lwalaka samu na masumu ya beto, mpe na bamputa ya Yandi beto me beluka.” Na yawu, ya kele ve na kima mu ke sala, na kubelusa beno. Ya kele ve na kima dibuundu ke sala, na kubelusa beno. Kima kaka beto lenda sambila kele yayi, ti lukwikilu ya beno kulemba ve, ti beno ke kwiza na autel

na suka yayi na kundima Klisto mutindu Munganga ya beno, mutindu beno salaka samu na Mvulusi ya beno. Mpe kukondwa ata . . . Nzambi ke salaka bimangu. Yandi ke lakisaka bidimbu ya nene. Bampofo, bantu ya kufwa makutu, mababa, nyonso, ke belukaka kaka awa na tabernacle. Kasi kana ya kele to ve, beto ke ndima Yawu, na mutindu nyonso. Bambala mingi bima yango kele na nzila ya ba-visions.

694 Bantu yikwa vwandaka awa pene ya Balumingu tatu me luta, to yiya, ntangu muntu kotaka awa, ya kufwa meso mpe kikata mpe, to yina vwanda vwandaka na fauteuil na kitezo ya nerf ya kufwa? Mpe ntete mu katuka yinzo, mu monaka yandi na vision, “Ti ya ke vwanda na muntu kuna, na bansuki ya ndombi, yina ke na kukituka mpembe. Kento ya yandi kele kento ya kitoko, pene ya bamvula makumi sambanu. Yandi ke kwiza mpe ke vwanda na kudila,” mpe yandi ke lomba munu. “Mpe na kuvutuka mpe na kusambila samu na bakala ya yandi.” Yandi vwandaka ya kuvwanda kuna.

695 Mpe mu kwizaka. Mu tubaka na mwa bankundi ya munu awa, “Beno tala mbote yayi.”

696 Mpe na yina beto kulumukaka na autel, bayankaka sambilaka. Ntangu mu kwendaka na kusambila, mu me katuka kaka mpe me vutuka na zulu awa. Mpe kento ya yandi telamaka mpe kwizaka kaka kieleka mutindu Mfumu tubaka ti ya ke vwanda. Bantu vwanda tala mbote, na kumona kana ya ke salama mutindu yina. Ya ke kondwaka ata mbala mosi ve. Mpe na yawu ntangu yandi tambulaka . . .

697 Beto bakulaka, ti muntu, Docteur Ackerman, ya Birdseye, na Indiana, vwandaka yandi yina fidisaka yandi kuna; yandi kele Katolika, mpe mwana ya yandi ya bakala kele nganga-Nzambi na monastère kuna na Saint Meinrad. Mpe Docteur Ackerman kele mpangi ya munu na kuzomba, mpe yandi fidisaka muntu yango awa. Mpe Mfumu lakisaka na munu ti muntu ya bansuki ya ndombi ke fidisa yandi, kasi mu zabaka ve nani ya vwandaka.

698 Mu tubaka, “Ya vwandaka Docteur Ackerman?”

699 Yandi tubaka, “Ya vwandaka.” Beno me mona? Mpe kuna muntu yango . . .

700 Mu tubaka, “Ya kele MUTINDU ME TUBA MFUMU.” Mu me belama. Mu tubaka, “Tata, telama.” Mpe ya kufwa meso mpe lendaka ve . . . yandi . . . Kitezo ya nerf kufwaka. Yandi vwanda lenda ve kutelama mutindu yina. Beno me mona? Vwandaka mutindu yina bamvula mingi, vwandaka na Mayos mpe bisika nyonso. Mpe sambilaka kaka kisambu samu na yandi, mpe telemisaka yandi. Kuna yandi kwendaka, na kutambulaka.

701 Ntete yandi tubaka, “Mu ke mona nge ve.” Na manima yandi me boka, “Yinga. Mu lenda.” Meso ya yandi zibukaka kuna, yandi na kuvwandaka orthodox, kento ya yandi, Presbytérien.

702 Bantu yankaka ke banzaka ti “Ba-Presbytérien ke boka ve, mpe ba-Orthodox.” Beno zolaka kuwa bawu. Kieleka. Bawu vwanda boka mpe vwanda kuyambana mosi na mosi. Me vutuka mpe me baka fauteuil roulant ya yandi, mpe me basika mpe me tambula, kaka mutindu muntu nyonso yankaka, lenda mona mpe kuzonza mpe—mpe nyonso.

703 Mu kuzwaka mukanda ya yandi, to lubokilu, kilumbu yankaka yina. Mu banza, Mpangi Cox kwendaka na yandi. Yandi tubaka, “Meso ya yandi vwanda pesa sensation ya kutatika.” Kieleka. Ya kele nerf, ba-nerf ya meso ke na kukulaka mpe ke na kuvutukaka na luzingu, beno zaba, mpe ke na bakaka kisika ya yawu. Ba me katula nsingulu.

704 Kana beno lenda bika yinza kuzwa nzila ya yawu, kana kima ve kukanga yinza, na yina ya ke—ya ke tambula ya muvimba. Kana beno kele na bande na diboko ya beno, yina ke kanga nzila, diboko ya beno ke kufwa na nsuka. Ntangu yayi, samu ti, landila yinza, ya ke vwanda kaka nyonso mbote kana beno ke bika kaka yawu swi. Kasi kima mosi me zenga yinza. Na yina, kana beno mona yawu ve, ya kele ve na mutindu na dokotolo na kusimba yawu. Kaka na nzila ya bima zole ti yandi lenda sala: yina yandi lenda mona, yina yandi lenda kuwa. Ya kele kaka na bima zole ti yandi lenda sala: yina yandi ke mona mpe yina yandi ke kuwa.

705 Kana yandi lenda mona yawu ve, kuna ya fwana vwanda ya kimpewe. Kuna ya kele, kaka na kima mosi, kima mosi lenda salama; beto ke sambila, Klisto ke katulaka nsingulu, ke basisaka dyabulu, mpe yina ke banda na kukuma mbote, mbote. Ke kuma mbote, mpe ya kele nyonso ya kele na yawu. “Na Nkumbu ya Munu bawu ke basisa bampeve ya yimbi.” Ya kele kieleka? Ya kele nsilulu samu na dibuundu. Ya kele nsilulu ya ngolo. Yinki? Ya, ya kele Mvwandulu ya Yandi na beto. Ntangu yayi, yinki ke sala beto kuvwanda ya kulunga na suka yayi, na kusala bima yango kaka mutindu Yandi salaka yawu, ya kele samu ti beto kele dyaka na vwale. Beno me mona? Kasi beto ke kuwa kima mosi kuna yina ke tuba na beto, “Oh, yinga.” Beno me mona?

706 Mpe ntangu beno ke ndima kubeluka ya beno, ata yina vwale ke tuba, ya kele yina Ndinga ke tuba. Beno me mona? Ya kele yina. Ya kele yina. Mpe Ndinga ntangu nyonso ke yalaka na zulu ya nyonso. Ndinga ya Nzambi ya Seko!

707 Beno tala Sara, kibutulu ya yandi ya kufwa, ya bamvula makumi yivwa, vwanda zinga na bakala ya yandi katuka yandi vwandaka pene ya bamvula kumi na sambanu to kumi na sambwadi, ata mwana ve; Abraham, bamvula nkama. Nzambi me soba kaka dyambu mpe pesaka bawu bébé. Beno me mona? Samu ti, bawu kwikilaka. Bawu bokilaka bima yango yina vwandaka ve, mutindu ti ya vwandaka. Kota nzila yina na suka yayi, nkundi.

⁷⁰⁸ Mpe na nkokila yayi, beto ke vingila . . . Kana beno nyonso yina me kwiza tala beto, beto kele na kyese na kuzwa beno awa na suka yayi. Mpe ti Nzambi vwanda na beno. Mpe kana beno kele na mbanza na nkokila yayi, beto ke sepela na kuzwa beno na nkokila yayi na lukutakanu yayi yina ke landa, ya Melchisédek. Mpe dyaka kana beno kele ve, mpe ti beno kele na dibundu ya beno mosi, beno kwenda na dibuundu ya beno. Yina kele—yina kele kisika ya beno ya kusala. Kana beno kele ya dibuundu mosi, beno kwenda kuna. Yayi kele kaka mwa tabernacle kisika beto ke vukanaka na kati awa mpe ke kuzwaka kubundana mosi na yankaka. Ntangu yayi, Mfumu sakumuna beno.

⁷⁰⁹ Mpe Mpangi-kento Gertie ke bula samu na beto, *Munganga Ya Nene Kele Ntangu Yayi Awa*. Mpe ya kele na muntu awa yina ba ke sambila? Beno telemisa diboko ya beno, bayina zola kukwiza na ndonga ya bisambu, samu na kutula lukwikilu ya beno na Klisto. Mbote mingi. Kana beno ke tandama lweka *yayi* ya dibuundu, kana beno zola. Mpe kana bawu lenda benda kiti yayi kaka mwa fyoti, mpangi, kana beno zola, samu ti beto kuzwa mwa kisika na kati kuna mpe samu na kulutisa bantu. Beno kwiza na lweka *yayi*.

⁷¹⁰ Mpe beto ke sambila ntangu yayi, na yina beto ke yimba. Mpe mu ke lombana bakuluntu awa, ya konso dénomination to dibuundu, ata nyonso yina ya kele, kana beno ke kwikila na kubeluka ya Kinzambi, beno ke zola kutelama awa na munu na chaire yayi, samu na kusambila bambevo? Beto ke sepela na kuzwa beno. Dénomination nyonso, to ya ata dénomination, to nyonso yina beno kele, beto ke sepela na kuzwa beno. Beno ke zola kaka kukwiza ntangu yayi, samu na kisambu? Beno belama mpe beno telama na munu.

Mpangi Neville, kana nge lenda kwiza na mafuta.



HEBREUX, KAPU YA SAMBANU 3 KNG57-0915M
(Hebrews, Chapter Six 3)

BANDANDANI YA BUKU YA BA-HEBREUX

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 15 ya Ngonda ya yivwa, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org